

ԳԼՈՒԽ 3

ՀԱՎԱՆԱԿԱՆՈՒԹՅՈՒՆՆԵՐԻ ՏԵՍՈՒԹՅՈՒՆ ԵՎ ՎԻՃԱԿԱԳՐՈՒԹՅՈՒՆ



Բաժին 1: Ներածություն անկախ և կախյալ պատահույթներ

Դասերի քանակը՝ 5

Դասեր

1. Հավանականությունների տեսության ներածություն:
2. Պայմանական հավանականություն և ծառածն դիագրամներ:
3. Անկախ պատահույթներ:

Նպատակներ

Պատահույթների հավանականությունների մասին գիտելիքի զարգացումը, անկախ ու կախյալ պատահույթների, ծառածն դիագրամների հետ ծանոթացումը:

Վերջնարդյունքներ

- Լուծի խնդիրներ՝ անկախ և կախյալ պատահույթների հավանականությունների վերաբերյալ, օգտվի ծառածն դիագրամներից:
- Հասկանա Թոմաս Բայեսի ներդրումը վիճակագրության և հավանականության տեսության մեջ:
- Հասկանա Թոմաս Բայեսի ներդրումը մեքենայական ուսուցման մեջ:
- Հաղորդի մաթեմատիկական հայեցակարգը բանավոր:
Ծանոթանա հավանականության տեսության բառապաշարին:
- Ծանոթանա նմուշների տարածություն, պատահույթ, հավանականություն, պատահույթների միավորում և հատում, պատահույթի լրացում հասկացություններին:
- Գտնի պատահույթի հավանականությունը:
- Հասկանա պայմանական հավանականություն հասկացությունը:
- Ներկայացնի հավանականային իրավիճակը ծառածն դիագրամով:
- Կիրառի պայմանական հավանականության սահմանումը:
- Կիրառի ամբողջական հավանականության օրենքը (the law of total probability):
- Սահմանի անկախ պատահույթներ:
Ստուգի երկու պատահույթների միմյանցից անկախությունը հավանականության բանաձևերի միջոցով:
- Կիրառի անկախ պատահույթների բանաձևը:
- Ստուգի երկու պատահույթների միմյանցից անկախ լինելը:

Ակնկալվող գիտելիք

Կիրառի հավանականության հիմնական գիտելիքները:

Մերոդարանություն

Դաս 1: Հավանականությունների տեսության ներածություն

ՆԱԽԱԲԱՆ ԱՌԱՋԱԴՐԱՆՔ (ՄՈՏ 10 ԲՈՊԵ)

Նպատակներ

Հասկանալ Թոմաս Բայեսի ներդրումը վիճակագրության և հավանականության տեսության մեջ:

Հասկանալ Թոմաս Բայեսի ներդրումը մեքենայական ուսուցման մեջ:

Հաղորդել մաթեմատիկական հայեցակարգը բանավոր:

Առաջադրանքի նկարագիր և իրականացման ուղեցույց

Երկրորդ կիսամյակում սովորողները կարող են ինքնուրույն ներկայացնել նախաբան առաջադրանքը, ինչը կգարգացնի մաթեմատիկական հասկացությունները բանավոր փոխանցելու և նյութը ներկայացնելու հմտությունները: Ուսուցիչը խրախուսում է տեխնոլոգիական գործիքների օգտագործումը և սովորողների կողմից նյութի հնարավորինս ինտերակտիվ մատուցումը: Ուսուցիչը կարող է կամ ինքը գնահատել այդ ներկայացումները կամ թողնել, որ սովորողներն իրենք գնահատեն՝ միավորային կամ ոչ միավորային տարբերակով: Ուսուցիչը պետք է մշակի նյութի ներկայացման հմտությունների և մաթեմատիկական բովանդակության վերաբերյալ ռուբրիկ, որը պետք է տրվի սովորողներին մինչ ներկայացման օրը: Եթե սովորողներն են գնահատում ներկայացումը, պետք է ունենան ռուբրիկը և ըստ այդմ գնահատեն ներկայացումը:

Ստորև տրված է գնահատման ռուբրիկի օրինակ:

	Բանավոր Ներկայացնելու հմտություն	Ներկայացնելու հմտություն	Մաթեմատիկական բովանդակություն
Չարգացման կարիք ունի	Ներկայացնողի ծայնը լսելի չէ: Միապաղաղ է:	Տեխնոլոգիական գործիքների կիրառումը նվազագույնն է: Ներկայացնողը չի հետևում լսարանի արձագանքին: Չկա փոխադարձ կապ, և սովորողները ներգրավված չեն:	Նյութում կան շատ անճշտություններ:
Լավ	Ներկայացնողի ծայնը լսելի է: Փոքր-ինչ միապաղաղ է:	Ներկայացնողը հետևում է միայն ուսուցչի կամ մեկ-երկու սովորողի արձագանքին: Բավականաչափ է կիրառում տեխնոլոգիական գործիքներ: Քիչ թվով սովորողների է ներգրավում ներկայացման ընթացքում:	Ներկայացվող նյութը ճշգրիտ է: Սովորողը մասամբ է հասկանում ներկայացվող նյութը և մասամբ կարողանում է պատասխանել դասընկերների հարցերին:
Գերազանց	Ներկայացնողի ծայնը բավականին լսելի է: Միապաղաղ չէ: Ձայնի տոնայնությունը հստակ փոփոխվում է:	Ներկայացնողը հետևում է բոլոր սովորողների արձագանքին: Կիրառում է զանազան տեխնոլոգիական գործիքներ: Ներգրավում է առավելագույն թվով սովորողների:	Ներկայացվող նյութը ճշգրիտ է, սկզբնաղբյուրները հստակ նշված են: Սովորողը հասկանում է իր հաղորդած նյութը և կարողանում է պատասխանել սովորողների հարցերին:

Երկրորդ կիսամյակում այս առաջադրանքը սովորողներին անհատապես կամ զույգով հանձնարարվող նախագծերի մի մասն է կազմում: Յուրաքանչյուր սովորողի կամ սովորողների զույգի հանձնարարվում է նախապատրաստել որևէ բաժնի նախաբան առաջադրանք: Այն կարող է լինել մաթեմատիկայի բնույթի կամ պատմության մասին կամ վերաբերի միջառարկայական խնդիրների լուծմանը: Սովորողների գնահատումը կատարվում է անհատապես նույնիսկ, եթե նրանք աշխատել են զույգով: Յուրաքանչյուր ներկայացմանը տրվում է ոչ ավել, քան 10 րոպե ժամանակ: Բովանդակության մաթեմատիկական մասի համար ուսուցիչը կարող է ընդլայնված

բացատրություններ և ռեսուրսներ տրամադրել սովորողներին, եթե դրանք ներառված չեն ներկայացվող նյութի մեջ:

Այս դասի համար սովորողների զույգին հանձնարարվում է պատրաստել և ներկայացնել նյութ՝ հավանականության տեսության մեջ թոմաս Բայեսի ունեցած ներդրման և մեքենայական ուսուցման մեջ տեսության կիրառման մասին:

Վիճակագրության և հավանականության տեսության զարգացմանը վերաբերող նյութերի օրինակներ, որոնք կարող են անհրաժեշտ լինել ուսուցչին.

- Թոմաս Բայեսն անգլիացի մաթեմատիկոս է, որը զգալի ներդրում է ունեցել վիճակագրության զարգացման մեջ:
- Նրա աշխատանքը քիչ ճանաչում է ունեցել կենդանության օրոք, բայց մահից հետո Բայեսի թեորեմը դառնում է Բայեսյան վիճակագրության և մեքենայական ուսուցման հիմնաքարը:
- Բայեսի թեորեմը մաթեմատիկական բանաձև է, որը նկարագրում է պատահույթի հավանականությունը՝ հիմնված պատահույթի վրա ազդող պայմանների նախնական իմացության վրա:
- Բայեսի թեորեմը, հիմնվելով նոր փաստերի կամ դիտարկումների վրա, հավանականությունների տեսության արդիականացման հիմք է ստեղծել:
- Թոմաս Բայեսի գաղափարները դարձել են մեքենայական ուսուցման անբաժանելի մասը:
- Մեքենայական ուսուցման մեջ Բայեսյան մեթոդներն ապահովում են համոզմունքները կամ մոդելներն արդիականացնելու հիմք՝ հիմնված նոր փաստերի կամ տվյալների վրա:
- Բայեսյան ցանցերը լայնորեն օգտագործվում են մեքենայական ուսուցման մեջ այնպիսի առաջադրանքների համար, ինչպիսին են հավանական պատճառաբանությունը, դասակարգումը և որոշումների կայացումը: Դրանք հնարավորություն են տալիս մոդելավորել փոփոխականների միջև կախվածությունը և արդիականացնելու համոզմունքները՝ նոր տեղեկատվությանը զուգընթաց:

ՆՅՈՒԹԻ ՄԱՏՈՒՑՈՒՄ ԵՎ ՉՈՒՅԳԵՐՈՎ ԱԾԽԱՏԱՆՔ (ՄՈՏ 10 ՐՈՊԵ)

Նպատակներ

Ծանոթանալ հավանականության տեսության բառապաշարին:

Ծանոթանալ նմուշների տարածություն, պատահույթ, հավանականություն, պատահույթների միավորում և հատում, պատահույթի լրացում հասկացություններին: Գտնել որոշակի պատահույթի հավանականություն:

Առաջադրանքի նկարագիր և իրականացման ուղեցույց

Առաջադրանքի ընթացքում ուսուցիչը ներկայացնում է *հավանականություն* հասկացությունը և ծանոթացնում բառապաշարին: Սկզբում ուսուցիչը ներկայացնում է *Նմուշների տարածություն* հասկացությունը: Նմուշների տարածությունը տվյալ իրավիճակի հնարավոր ելքերի բազմությունն է: Այն նշանակվում է Ω տառով: Օրինակ՝ մետաղադրամ նետելիս հնարավոր է երկու արդյունք՝ զինանշան կամ գիր: Այսպիսով, $\Omega = \{\text{զինանշան, գիր}\}$: Երբ նետում են կանոնավոր վեցանիստ զառ՝ համարակալված 1-6 թվերով, նմուշների տարածությունն է $\Omega = \{1, 2, 3, 4, 5, 6\}$: Երբ նետում են երկու մետաղադրամ, նմուշների տարածությունն է՝ $\Omega = \{\text{զինանշան-զինանշան, զինանշան-գիր, գիր-զինանշան, գիր-գիր}\}$: Վերջապես, եթե նետում են երկու զառ և

դիտարկում վերին նիստերի թվերը, ապա նմուշների տարածությունը բոլոր (a, b) տեսքի կարգավորված թվագույգերն են, որտեղ a -ն և b -ն 1-ից 6 թվերից մեկն են: Այս դեպքում, եթե խնդիրը վերին նիստերի թվերի գումարի մասին է, հնարավոր է օգտագործել աղյուսակ, որը ցույց է տալիս երկու զառերի արդյունքները և դրանց գումարը:

	1	2	3	4	5	6
1	2	3	4	5	6	7
2	3	4	5	6	7	8
3	4	5	6	7	8	9
4	5	6	7	8	9	10
5	6	7	8	9	10	11
6	7	8	9	10	11	12

Այս աղյուսակը շատ օգտակար է: Այն օգնում է սովորողներին պատկերացնել հնարավոր ելքերը և դրանց հաճախականությունները: Սա անհրաժեշտ կլինի հաջորդ դասերի ժամանակ յուրաքանչյուր ելքի հավանականությունը հաշվելիս:

Նմուշների տարածության ցանկացած ենթաբազմություն կոչվում է *պատահույթ*: Օրինակ, երբ նետում են զառ, պատահույթ կարող է համարվել զույգ թիվ բացվելը՝ $A = \{2, 4, 6\}$, կամ կենտ թիվ բացվելը՝ $B = \{1, 3, 5\}$, կամ 4-ից մեծ թիվ բացվելը՝ $C = \{5, 6\}$, կամ պարզ թիվ բացվելը՝ $D = \{2, 3, 5\}$: Պատահույթի հավանականությունն ընդունում է արժեքներ 0-ից 1 միջակայքում և ցույց տալիս պատահույթի հանդես գալու հնարավորությունը: Օրինակ՝ չկեղծված մետաղադրամ նետելիս զինանշանի հանդես գալու հավանականությունը $\frac{1}{2}$ է, գրի հանդես գալու հավանականությունը ևս $\frac{1}{2}$ է: Իսկ չկեղծված զառ նետելիս 1 բացվելու հավանականությունը $\frac{1}{6}$ է, 5 բացվելու հավանականությունը ևս $\frac{1}{6}$ է:

Հավաստի պատահույթի հավանականությունը 1 է: Օրինակ՝ կանոնավոր զառ նետելիս 7-ից փոքր բնական թիվ բացվելու հավանականությունը 1 է:

Անհնար պատահույթի հավանականությունը 0 է: Ուսուցիչը հանձնարարում է սովորողներին օրինակներ բերել: Նա կարող է ավելացնել օրինակ. զառի վրա 10 թիվ բացվել չի կարող, հետևաբար՝ 10 բացվելու հավանականությունը 0 է:

A պատահույթի հավանականությունը նշանակում են $P(A)$ -ով և հավասար է A -ի նպաստավոր ելքերի և հնարավոր բոլոր ելքերի հարաբերությանը: Այսպիսով,

$$P(A) = \frac{A\text{-ի նպաստավոր ելքերի քանակ}}{\text{բոլոր հնարավոր ելքերի քանակ}}:$$

Ուսուցիչը տալիս է մի քանի թույլ ժամանակ, որպեսզի սովորողները, աշխատելով զույգերով, վերը նշված զառ նետելու օրինակում գտնեն A , B , C և D պատահույթների հավանականությունները: Սովորողները կիսվում են իրենց պատասխաններով և


դատողություններով դասարանական քննարկման ընթացքում: Ուսուցիչը բացատրում է՝ ինչպես հաշվել հետևյալ հավանականությունները.

$$P(A) = \frac{3}{6} = \frac{1}{2}, \quad P(B) = \frac{3}{6} = \frac{1}{2}, \quad P(C) = \frac{2}{6} = \frac{1}{3}, \quad P(D) = \frac{3}{6} = \frac{1}{2}:$$


Առաջադրանքի ավարտին ուսուցիչը սովորողներին ներկայացնում է երկու պատահույթների հատման և միավորման, պատահույթի լրացման գաղափարները:

Ուսուցիչը նշում է, որ երբ երկու պատահույթներն էլ պետք է տեղի ունենան, ապա դա անվանում ենք A և B պատահույթների հատում և նշանակում $A \cap B$: Եթե $A \cap B = \emptyset$, ապա A և B պատահույթները կոչվում են անհամատեղելի: Օրինակ՝ ձեր դպրոցի երկու 10-րդ և 11-րդ դասարաններն անհամատեղելի են: Այնուամենայնիվ, ձեր դպրոցի 10-րդ դասարանը և ֆուտբոլի թիմը հնարավոր է անհամատեղելի չլինեն, քանի որ կարող են լինել 10-րդ դասարանի աշակերտներ, ովքեր նաև դպրոցի ֆուտբոլի թիմում են:

Ուսուցիչը պատկերում է պատահույթների հատումը Վեննի դիագրամի միջոցով: Այս դիագրամներով բացատրելը պարտադիր չէ: Որոշ ուսուցիչներ գուցե նախընտրեն բաց թողնել սա:




$A \cap B \neq \emptyset$, անհամատեղելի չեն:




$A \cap B = \emptyset$, անհամատեղելի են:

Երբ կամ A պատահույթը, կամ B պատահույթը, կամ երկուսն էլ տեղի ունեն, ապա այդ պատահույթն անվանում են A և B պատահույթների միավորում և նշանակում $A \cup B$:



A պատահույթի լրացում պատահույթն անվանում են Ω նմուշների տարածության այն բոլոր ելքերի բազմությունը, որոնք A պատահույթին չեն պատկանում: Այն նշանակվում է \bar{A} :



Վենսի դիագրամի օգտագործումը կարևոր է դասը հետաքրքիր դարձնելու համար: Որոշ սովորողներ հնարավոր է ավելի հեշտ ըմբռնեն տեսողական տրվող նյութը, այդ իսկ պատճառով ներկայացման զանազան միջոցների օգտագործումը օգտակար է:

Ուսուցիչն ավարտում է առաջադրանքը զառի օրինակով, որին սովորողներն անդրադարձել էին առաջադրանքի սկզբում: Չառի նետման օրինակում դիտարկենք երկու պատահույթ՝ $A = \{\text{բացվել է զույգ թիվ}\}$, $B = \{\text{բացվել է 4-ից մեծ թիվ}\}$: Ուսուցիչը տալիս է մի քանի բուլետեններ, որպեսզի սովորողները հաշվեն $P(A \cap B)$, $P(A \cup B)$, $P(\bar{A})$ և $P(\bar{B})$: Սովորողները հասկանում են, որ $A = \{2, 4, 6\}$, $B = \{5, 6\}$: Նրանք եզրակացնում են՝ $P(A) = \frac{3}{6} = \frac{1}{2}$ և $P(B) = \frac{2}{6} = \frac{1}{3}$: Այնուհետև, զույգերով աշխատելով՝ սովորողները գտնում են.

$$A \cap B = \{6\}, P(A \cap B) = \frac{1}{6},$$

$$A \cup B = \{2, 4, 5, 6\}, P(A \cup B) = \frac{4}{6} = \frac{2}{3},$$

$$\bar{A} = \{1, 3, 5\}, P(\bar{A}) = \frac{3}{6} = \frac{1}{2},$$

$$\bar{B} = \{1, 2, 3, 4\}, P(\bar{B}) = \frac{4}{6} = \frac{2}{3}:$$

Առաջադրանքի ավարտին սովորողները կիսվում են իրենց պատասխաններով դասարանական քննարկման ընթացքում: Ուսուցիչը շեշտում է, որ $P(\bar{A}) = 1 - P(A)$, $P(\bar{B}) = 1 - P(B)$ և $P(A \cup B) = P(A) + P(B) - P(A \cap B)$: Սովորողները պետք է ստուգեն, որ նախորդ օրինակը բավարարում է նշված հատկություններին: Ուսուցիչը եզրակացնում է, որ այս հատկությունները սովորողները կարող են օգտագործել ցանկացած դեպքում:

ԻՆՔՆՈՒՐՈՒՅՆ ԱՇԽԱՏԱՆՔ (ՄՈՏ 15 ՐՈՊԵ)

Նպատակներ

Գտնել պատահույթի հավանականությունը:

Գտնել երկու պատահույթների միավորման, հատման և լրացման հավանականությունները:

Առաջադրանք

Խնդիր 1

Խաղաքարտերով խաղում կա 52 խաղաքարտ՝ 26 կարմիր և 26 սև, որտեղ 4 արքա՝ 2 կարմիր և 2 սև:

Դիտարկե՛ք հետևյալ պատահույթները.

$K = \{\text{արքա վերցնելը}\},$

$R = \{\text{կարմիր քարտ վերցնելը}\}:$

Գտե՛ք $P(R)$, $P(K)$, $P(K \cap R)$, $P(K \cup R)$, $P(\bar{K})$ և $P(\bar{R})$ հավանականությունները:

Խնդիր 2

Երկու կանոնավոր քառանիստ զառ են նետել: S -ը ցույց է տալիս վերին նիստերի թվերի գումարը:

1) Գծե՛ք սմուշների տարածությունը ներկայացնող աղյուսակ:

2) Հաշվե՛ք $S = 5$ պատահույթի հավանականությունը:

3) Հաշվե՛ք $S \geq 5$ պատահույթի հավանականությունը:

Խնդիր 3

Դիցուք՝ $P(A) = 0,3$, $P(B) = 0,2$ և $P(A \cap B) = 0,1$:

Հաշվե՛ք $P(A \cup B)$, $P(\bar{A})$ և $P(\bar{B})$ հավանականությունները:

Լուծում

Խնդիր 1

$$P(R) = \frac{26}{52} = \frac{1}{2}, \quad P(K) = \frac{4}{52} = \frac{1}{13},$$

$$P(K \cap R) = \frac{2}{52} = \frac{1}{26}, \quad P(K \cup R) = P(K) + P(R) - P(K \cap R) = \frac{1}{13} + \frac{1}{2} - \frac{1}{26} = \frac{14}{26} = \frac{7}{13},$$

$$P(\bar{K}) = 1 - P(K) = \frac{12}{13}, \quad P(\bar{R}) = 1 - P(R) = \frac{1}{2}:$$

Խնդիր 2

1)

	1	2	3	4
1	2	3	4	5
2	3	4	5	6
3	4	5	6	7
4	5	6	7	8

$$2) P(S = 5) = \frac{4}{16} = \frac{1}{4}:$$

$$3) P(S \geq 5) = \frac{10}{16} = \frac{5}{8}:$$

Խնդիր 3

$$P(A \cup B) = P(A) + P(B) - P(A \cap B) = 0,4,$$

$$P(\bar{A}) = 1 - P(A) = 0,7,$$

$$P(\bar{B}) = 1 - P(B) = 0,8:$$

Առաջադրանքի նկարագիր և իրականացման ուղեցույց

Սովորողներն աշխատում են ինքնուրույն: Առաջադրանքի ավարտին սովորողները կիսվում են իրենց պատասխաններով դասարանական քննարկման ժամանակ:

Դժվարանալու դեպքում սովորողներն աշխատում են զույգերով, որոնք կազմվում են հետևյալ կերպ՝ ամենաարագն ավարտած սովորողն ամենադժվարացողի հետ մոտեցմամբ: Ուսուցիչը կարող է հարցնել, թե ով օգնության կարիք ունի և ընտրել սովորողի, որը կօգնի դժվարացողներին, կամ ուսուցիչն ինքը կարող է օգնել: Առաջին խնդրի առաջին երեք ենթակետում սովորողները կիրառում են $P(A) = \frac{A\text{-ի նպաստավոր ելքեր}}{\text{բոլոր հնարավոր ելքեր}}$ բանաձևը: Նրանք նախ հաշվում են յուրաքանչյուր ենթաբազմության տարրերի քանակը: Առաջին խնդրի վերջին երեք ենթակետում սովորողները կիրառում են պատահույթների միավորման և լրացում պատահույթի հաշվման բանաձևերը: Եթե սովորողները չեն հիշում այդ բանաձևերը, նրանք կարող են դիմել իրենց դասընկերների օգնությանը: Անհրաժեշտության դեպքում ուսուցիչը միջամտում է: Հնարավոր է, որ որոշ սովորողներ փորձեն հաշվել $K \cup R$ կամ \bar{K} ենթաբազմությունների տարրերի քանակը, վերջինս ավելի բարդ է, բայց ընդունելի է: Երկրորդ խնդրում որոշ սովորողներ հնարավոր է դժվարանան աղյուսակը կառուցելիս: Ուսուցիչը օգնում է այդ սովորողներին: Այնուհետև, սովորողները գտնում

են պահանջվող հավանականությունները՝ հաշվելով նպաստավոր ելքերի հաճախականությունները: Վերջին օրինակում սովորողները կիրառում են պատահույթների միավորման և լրացում պատահույթի հաշվման բանաձևերը՝ պահանջվող հավանականությունները հաշվելու համար:



ՏՆԱՅԻՆ ԱՇԽԱՏԱՆՔ

Հետևյալ խնդիրները հանձնարարել որպես տնային աշխատանք:

Գլուխ 5: Խնդիրներ 1, 2, 3, 4, 5, 6, 7, 8, 9 (Էջ 160) հանձնարարել որպես տնային աշխատանք Կ. Առաքելյանի հեղինակած «Հանրահաշիվ և մաթեմատիկական անալիզի տարրեր 10» դասագրքից:

Առաջադրանք

Հետևյալ փորձերի համար պարզե՛ք նմուշների տարածությունը և հաշվե՛ք պատահույթների հավանականությունը:

1. Չկեղծված զառը նետում են մեկ անգամ և գրանցում բացված թիվը կենտ է, թե զույգ: Գտե՛ք զույգ բացվելու հավանականությունը:

2. Նետում են երկու մետաղադրամ: Գտե՛ք հավանականությունը, որ երկուսի վրա էլ կբացվի միևնույն երեսը:

3. Թղթախաղի տուփում կա 52 խաղաթուղթ, որից հանում են մեկ խաղաթուղթ: Գտե՛ք հավանականությունը, որ այն սիրտ նշանով է:

4. 52 խաղաթղթով տուփից հանում են մեկը, գրանցում նշանը և վերադաձնում տուփ: Այս պահին հանում են ևս մեկ խաղաթուղթ: Գտե՛ք կամայական հերթականությամբ ագռավի և խաչի նշաններ դուրս գալու հավանականությունը:

5. Նետում են զառ և մետաղադրամ: Գտե՛ք զինանշան և 6 բացվելու հավանականությունը:

6. Նետում են 2 վեցանիստ զառ և գրանցում կողային նիստերի վրա բացված երկու ամենամեծ թվերի արտադրյալը: Գտե՛ք հավանականությունը, որ արդյունքը մեծ է 24-ից: (Հուշում. Սովորական վեցանիստ զառի հանդիպակաց նիստերի գումարը 7 է, իսկ 1, 2 և 3 թվերով նիստերը ունեն մեկ ընդհանուր գագաթ)

(Առաջադրանքները Տավուշի մարզում Նոր չափորոշիչների փորձարկման համար մշակված 10-րդ դասարանի «Հանրահաշիվ և մաթեմատիկական անալիզի տարրեր» առարկայի խորացված ծրագրի ուսումնական նյութերից են:)

Դաս 2: Պայմանական հավանականություն և ծառածն դիագրամներ

ՆՅՈՒԹԻ ՄԱՏՈՒՑՈՒՄ ԵՎ ՉՈՒՅԳԵՐՈՎ ԱՇԽԱՏԱՆՔ (ՄՈՏ 20 ՐՈՊԵ)

Նպատակներ

Հասկանալ պայմանական հավանականություն հասկացությունը:

Ներկայացնել իրավիճակը հավանականությունների ծառածն դիագրամով:

Կիրառել պայմանական հավանականության սահմանումը:

Կիրառել ամբողջական հավանականության օրենքը:

Առաջադրանքի նկարագիր և իրականացման ուղեցույց

Ուսուցիչն օրինակով ներկայացնում է պայմանական հավանականություն հասկացությունը: Հավանականությունը, որ պատվաստված անհատը կունենա առողջական բարդություններ, եթե վարակվի վիրուսով, 0,01 է: Եթե անհատը պատվաստված չէ, բարդություններ ունենալու հավանականությունը 0,3 է: Հավանականությունը, որ պատահականորեն ընտրված անհատը պատվաստված է տվյալ վիրուսի դեմ, 0,9 է:

Դիտարկե՛ք հետևյալ պատահույթները.

V = {անհատը պատվաստված է},


C = {անհատը ունի առողջական բարդություններ}:

Նախ՝ ուսուցիչը բացատրում է, որ առողջական բարդություններ ունենալը կախված է՝ արդյոք անհատը պատվաստված է, թե ոչ: Այս տիպի հավանականությունը կոչվում է *պայմանական հավանականություն*: Ուսուցիչը գրառում է $P(C|V)$: Սա բարդությունների հավանականությունն է, եթե հայտնի է, որ անձը պատվաստված է: Այսպիսով՝ $P(C|V) = 0,01$ և ցույց է տալիս պատվաստվածների խմբում բարդությունների առաջացման հավանականությունը: Այժմ ուսուցիչը հարցնում է սովորողներին՝ ինչ հավանականություն են ցույց տալիս 0,3 և 0,9 թվերը: 0,3 թիվը չպատվաստված անհատի առողջական բարդություններ ունենալու հավանականությունն է: Այսպիսով, $P(C|\bar{V}) = 0,3$ և ցույց է տալիս չպատվաստվածների խմբում բարդությունների առաջացման հավանականությունը:


Վերջապես, $P(V) = 0,9$: Ուսուցիչը շեշտում է պայմանական հավանականության և հավանականության տարբերությունը: Պայմանական հավանականության դեպքում տեղի է ունենում պատահույթ, որն ազդում է երկրորդ պատահույթի տեղի ունենալու վրա: Այդ դեպքում նմուշների տարածության տարրերի քանակը նվազում է:

Այս փուլում ուսուցիչը բացատրում է՝ ինչպես խնդրի տվյալները ներկայացնել ծառածն դիագրամի միջոցով: Էական է բացատրել, թե որ պատահույթից է պետք սկսել: Այս դեպքում ունենք երկու տարբերակ՝ սկսել V և \bar{V} կամ C և \bar{C} : Քանի որ գիտենք $P(V)$ և

$P(C|V)$ հավանականությունները, ապա առաջին ճյուղերը կներկայացնեն V և \bar{V} պատահույթները:



Ծառածն դիագրամը նկարելուց հետո սովորողները պետք է համապատասխան ճյուղերի վրա ավելացնեն տրված հավանականությունները և ստանան՝




Այժմ սովորողները պետք է լրացնեն ծառածն դիագրամի մյուս ճյուղերը:

Ուսուցիչը բացատրում է, որ յուրաքանչյուր հանգույցում ճյուղերի թվերի գումարը հավասար է լինելու 1-ի: Այսպիսով, \bar{V} հավանականությունը գտնելու համար՝ $P(\bar{V}) = 1 - P(V) = 1 - 0,9 = 0,1$:

Նույնկերպ, $P(\bar{C}|V) = 1 - P(C|V) = 1 - 0,01 = 0,99$:

$P(\bar{C}|\bar{V}) = 1 - P(C|\bar{V}) = 1 - 0,3 = 0,7$:



Ուսուցիչը բացատրում է, որ $P(V \cap C)$ հավանականությունը գտնելու համար սովորողները պետք է բազմապատկեն V -ից C տանող ճյուղերի արժեքները՝ $P(V)$ և $P(C|V)$:

Ստանում են՝ $P(V \cap C) = P(V) \times P(C|V) = 0,9 \times 0,01 = 0,009$: Այս օրենքը հայտնի է որպես պայմանական հավանականության սահմանում: Այժմ ուսուցիչը բացատրում է, որ $P(C)$ հաշվելու համար սովորողները պետք է գումարեն բոլոր C -ով վերջացող ճյուղերի արժեքները: Ստացվում է՝ $P(V \cap C) + P(\bar{V} \cap C)$: Այնուհետև, կիրառելով պայմանական հավանականության սահմանումը, գտնում են՝

$$P(\bar{V} \cap C) = P(\bar{V}) \times P(C|\bar{V}) = 0,1 \times 0,3 = 0,03:$$

Ապա՝ $P(C) = P(V \cap C) + P(\bar{V} \cap C) = 0,009 + 0,03 = 0,039$: Այս օրենքը կոչվում է ամբողջական հավանականության օրենք: Ի վերջո, ուսուցիչը բացատրում է՝ ինչպես գտնել $P(V|C)$ հավանականությունը: Սովորողները կիրառում են պայմանական հավանականության սահմանումը՝ $P(V|C) = \frac{P(V \cap C)}{P(C)} = \frac{0,009}{0,039} = \frac{9}{39}$: Առաջադրանքի ավարտին ուսուցիչը բացատրում է $P(V|C)$, $P(C|V)$ և $P(V \cap C)$ հավանականությունների տարբերությունը: Շատ սովորողներ կոժվարանան հասկանալ տարբերությունները: Այդ պատճառով ուսուցիչը պետք է դա հստակ բացատրի: Ուսուցիչը ավարտում է աշխատանքը՝ կրկնելով երկու բանաձևերը: Պայմանական հավանականության սահմանումն է՝ $P(A|B) = \frac{P(A \cap B)}{P(B)}$, իսկ ամբողջական հավանականության բանաձևը՝ $P(B) = P(A \cap B) + P(\bar{A} \cap B)$:

Նշում

Ուսուցիչը կարող է նախընտրել պայմանական հավանականությունը ներկայացնել հաջորդ օրինակի միջոցով (ներկայացված է ինքնուրույն աշխատանքի բաժնում) և տեղափոխել այս երկու օրինակները: Այդ օրինակը կօգնի ուսուցչին սկսել գնդակների վերաբերյալ գործնական օրինակով: Կարելի է օգտագործել իրական գունավոր գնդակներ: Որոշ սովորողներ հնարավոր է նախընտրեն շոշափելի օրինակներ՝ պայմանական հավանականություն հասկացությունն ավելի լավ հասկանալու համար: Այնուամենայնիվ, առաջադրանքում քննարկված օրինակն իրական կյանքից է, որտեղ պայմանական հավանականության հայեցակարգի բացատրությունը կարող է ավելի իրատեսական և համապատասխան լինել սովորողների մեծամասնության համար:

ԻՆՔՆՈՒՐՈՒՅՆ ԱՇԽԱՏԱՆՔ (ՄՈՏ 15 ՐՈՊԵ)

Նպատակներ

Ներկայացնել իրավիճակը հավանականությունների ծառածն դիագրամով:

Կիրառել պայմանական հավանականության սահմանումը:

Կիրառել ամբողջական հավանականության օրենքը:

Առաջադրանք

3 կապույտ և 4 կարմիր գնդակ պարունակող սափորից հաջորդաբար և առանց վերադարձնելու հանում ենք երկու գնդակ:

Դիցուք՝ B_1 -ով նշանակենք այն պատահույթը, որ առաջին հանված գնդակը կապույտ է:

Դիցուք՝ R_1 -ով նշանակենք այն պատահույթը, որ առաջին հանված գնդակը կարմիր է:

Դիցուք՝ B_2 -ով նշանակենք այն պատահույթը, որ երկրորդ հանված գնդակը կապույտ է:

Դիցուք՝ R_2 -ով նշանակենք այն պատահույթը, որ երկրորդ հանված գնդակը կարմիր է:

1) Հաշվե՛ք $P(B_1)$, $P(R_1)$, $P(B_2|B_1)$ և $P(B_2|R_1)$ հավանականությունները:

2) Գծե՛ք համապատասխան ծառածն դիագրամը:

3) Գտե՛ք հավանականությունը, որ երկու գնդակներն էլ կապույտ են:


4) Գտե՛ք հավանականությունը, որ երկրորդ գնդակը կապույտ է:

Գտե՛ք հավանականությունը, որ առաջին գնդակը կապույտ է, եթե հայտնի է, որ երկրորդ գնդակը նույնպես կապույտ է:

Լուծում

1) $P(B_1) = \frac{3}{7}$, $P(R_1) = \frac{4}{7}$, $P(B_2|B_1) = \frac{2}{6}$, $P(B_2|R_1) = \frac{3}{6}$,

2)



$$3) P(B_1 \cap B_2) = P(B_1) \times P(B_2|B_1) = \frac{3}{7} \times \frac{2}{6} = \frac{1}{7},$$

$$4) P(B_2) = P(B_1 \cap B_2) + P(R_1 \cap B_2) = \frac{1}{7} + \frac{4}{7} \times \frac{3}{6} = \frac{1}{7} + \frac{2}{7} = \frac{3}{7},$$

$$5) P(B_1|B_2) = \frac{P(B_1 \cap B_2)}{P(B_2)} = \frac{\frac{1}{7}}{\frac{3}{7}} = \frac{1}{3}:$$

Առաջադրանքի նկարագիր և իրականացման ուղեցույց

Սովորողներն աշխատում են ինքնուրույն: Առաջադրանքի ավարտին սովորողները կիսվում են իրենց պատասխաններով դասարանական քննարկման ժամանակ: Դժվարանալու դեպքում սովորողներն աշխատում են զույգերով, որոնք կազմվում են հետևյալ կերպ՝ ամենաարագն ավարտած սովորողն ամենադժվարացողի հետ մոտեցմամբ: Ուսուցիչը կարող է հարցնել, թե ով օգնության կարիք ունի և ընտրել սովորողի, որը կօգնի դժվարացողներին, կամ ուսուցիչն ինքը կարող է օգնել: Առաջին մասում որոշ սովորողներ հնարավոր է դժվարանան հաշվել $P(B_2|B_1)$ և $P(B_2|R_1)$ հավանականությունները: Այստեղ ուսուցիչը կարող է բացատրել, թե ինչպես գտնել այդ հավանականությունները: Իրավիճակի պատկերումը օգտակար կլինի: Այնուհետև, սովորողները գծում են ծառածն դիագրամ: Որոշ սովորողներ գուցե որոշեն նախ գտնել $\overline{B_1}$, ինչը օգտակար չէ: Ծառածն դիագրամը նկարելիս շատ սխալ պատկերացումներ կարող են լինել: Որոշ սովորողներ գուցե որոշեն տեղադրել B_1 և $\overline{B_1}$ առաջին ճյուղերի վրա: Նրանք նույնիսկ կարող է ցանկանան տեղադրել B_1 և B_2 առաջին ճյուղերի վրա: Երրորդ մասում պետք է կիրառել պայմանական հավանականության սահմանումը: Չորրորդ մասում պետք է կիրառել ամբողջական հավանականության բանաձևը՝ $P(B_2)$ հաշվելու համար: Երրորդ և չորրորդ մասերում որոշ սովորողներ կարող են նախընտրել օգտագործել ծառածն դիագրամը՝ բանաձևերի փոխարեն: Սա ընդունելի մոտեցում է: Վերջապես, վերջին մասում սովորողները պետք է կիրառեն պայմանական հավանականության սահմանումը: Ուսուցիչը նշում է, որ այս դեպքում փոխում ենք հերթականությունը: Մենք գիտենք $P(B_2|B_1)$ հավանականությունը և փորձում ենք գտնել $P(B_1|B_2)$ հավանականությունը: Որոշ սովորողներ հնարավոր է դժվարանան հասկանալ այս գաղափարը, հատկապես այն պատճառով, որ նրանց անհերթի կթվա գտնել B_1 -ի հավանականությունը, եթե B_2 արդեն հայտնի է: Ուսուցիչը շեշտում է, որ պայմանական հավանականության

դեպքում պարտադիր չէ պահել պատահույթների ժամանակագրական հերթականությունը:



ՏՆԱՅԻՆ ԱՇԽԱՏԱՆՔ

Հետևյալ խնդիրները հանձնարարել որպես տնային աշխատանք:

1. Պարկում կա 5 կարմիր և 4 կապույտ ժետոն: Պատահականորեն ընտրում են մեկ ժետոն, գրանցում գույնը և առանց վերադաձնելու հանում են երկրորդ ժետոնը: Գտե՛ք հավանականությունը, որ.

ա. երկրորդ ժետոնը կարմիր է, երբ առաջինը կապույտ է,

բ. երկրորդ ժետոնը կապույտ է, երբ առաջինը կարմիր է,

գ. երկուսն էլ կապույտ են,

դ. հանել են մեկ կարմիր և մեկ կապույտ ժետոն:

2. 24 շոկոլադե սալիկ պարունակող արկղում կա 10-ը մուգ և 14 կաթնային շոկոլադե սալիկ: Լինդան պատահականորեն ընտրում է մեկ շոկոլադե և ուտում, ապա՝ երկրորդը: Գտե՛ք հավանականությունը, որ Լինդան կուտի.

ա. երկու մուգ շոկոլադե,

բ. մեկ մուգ և մեկ կաթնային շոկոլադե:

3. Ջենը միշտ աշխատանքի է գնում ավտոբուսով կամ տաքսիով: Եթե մի օր նա աշխատանքի է գնում ավտոբուսով, ապա հաջորդ օրը տաքսիով աշխատանքի գնալու հավանականությունը 0,4 է: Եթե նա մի օր նա աշխատանքի գնա տաքսիով, ապա հաջորդ օրն ավտոբուսով աշխատանքի գնալու հավանականությունը 0,7 է: Տրված է, որ Ջենը երկուշաբթի աշխատանքի է գնացել ավտոբուսով: Գտե՛ք հավանականությունը, որ նա չորեքշաբթի աշխատանքի կգնա տաքսիով:

4. Սյուն երկու մետաղադրամ ունի: Մեկը կանոնավոր է՝ մի երեսին գիր, մյուսին՝ զինանշան: Սյունը մետաղադրամը կեղծ է՝ երկու երեսին էլ գիր: Սյուն պատահականորեն ընտրում է մետաղադրամներից մեկը և նետում:

ա. Գտե՛ք հավանականությունը, որ մետաղադրամի վրա զինանշան կբացվի:

բ. Եթե մետաղադրամի վրա գիր է բացվել, գտե՛ք հավանականությունը, որ Սյուն ընտրել էր կանոնավոր մետաղադրամը:

5. Հեռուստամրցաշարի մասնակցին առաջարկեցին ընտրել երեք դռներից մեկը: Դռներից մեկի ետևում մրցանակն իրական մեքենա է, իսկ մյուս երկուսի ետևում՝ խաղալիք մեքենա: Մասնակիցը պատահականորեն ընտրում է մեկ դուռ: Հաղորդավարը դռանից հետո բացում է մնացած երկու դռներից մեկը և գտնում խաղալիք մեքենա: Հաղորդավարն առաջարկում է մասնակցին փոխել իր ընտրությունը: Հիմնավորե՛ք, թե մասնակցին ի՞նչ կառաջարկեք անել, որպեսզի նա ունենա իրական մեքենա շահելու ամենամեծ հավանականությունը: Հաշվարկները պարզ ներկայացնել:

(Առաջադրանքները Տավուշի մարզում Նոր չափորոշիչների փորձարկման համար մշակված 10-րդ դասարանի «Հանրահաշիվ և մաթեմատիկական անալիզի տարրեր» առարկայի խորացված ծրագրի ուսումնական նյութերից են:)

Դաս 3: Անկախ պատահույթներ

ՆՅՈՒԹԻ ՄԱՏՈՒՑՈՒՄ (ՄՈՏ 15 ՐՈՊԵ)

Նպատակներ

Սահմանել անկախ պատահույթներ:

Ստուգել երկու պատահույթների միմյանցից անկախությունը հավանականության բանաձևերի միջոցով:

Առաջադրանքի նկարագիր և իրականացման ուղեցույց

Առաջադրանքի ընթացքում ուսուցիչը ներկայացնում է անկախ պատահույթներ հասկացողությունը: Նա բացատրում է, որ եթե պատահույթի իրականանալը չի ազդում մյուս պատահույթի իրականանալու վրա, ապա այդ երկու պատահույթները կոչվում են *անկախ*: Օրինակ՝ եղանակը չի ազդում երեխաների դպրոց հաճախելու վրա: Այնուամենայնիվ, այն կարող է ազդել, թե արդյոք նրանք գնալու են բացօթյա փառատոնի, թե ոչ: Առաջին դեպքում երկու պատահույթներն անկախ են, երկրորդում՝ կախյալ:

Եթե երկու՝ A և B , պատահույթներ անկախ են, ապա $P(A|B) = P(A)$: Բայց գիտենք, որ $P(A|B) = \frac{P(A \cap B)}{P(B)}$, հետևաբար, եթե $P(A|B) = P(A)$, ստանում ենք՝

$$P(A) = \frac{P(A \cap B)}{P(B)} \Rightarrow P(A \cap B) = P(A) \times P(B):$$

Ուսուցիչը շարունակում է օրինակով: Դիցուք՝ $P(A) = 0,2$ և $P(B) = 0,3$: Հաշվե՛ք $P(A \cap B)$ հավանականությունը, եթե A և B պատահույթներն անկախ են: Ուսուցիչը տալիս է մի քանի րոպե ժամանակ որպեսզի սովորողները մտածեն: Այնուհետև, սովորողները կիսվում են իրենց պատասխաններով դասարանական քննարկման ընթացքում: Նրանցից շատերը կնկատեն, որ քանի որ երկու՝ A և B , պատահույթներն անկախ են, ապա $P(A \cap B) = P(A) \times P(B) = 0,2 \times 0,3 = 0,06$: Երկու պատահույթների անկախությունը ստուգելու համար կարելի է ստուգել $P(A|B) = P(A)$ կամ $P(A) \times P(B) = P(A \cap B)$ պայմաններից որևէ մեկը:

ԶՈՒՅԳԵՐՈՎ ԱՇԽԱՏԱՆՔ (ՄՈՏ 10 ՐՈՊԵ)

Նպատակներ

Կիրառել անկախ պատահույթների բանաձևը:

Ստուգել, որ երկու պատահույթներ միմյանցից անկախ են:

Առաջադրանք

Ստուգե՛ք, արդյոք A և B պատահույթներն անկախ են.

- 1) $P(A) = 0,2, P(B) = 0,8$ և $P(A \cap B) = 0,2$,
- 2) $P(A) = 0,4, P(B) = 0,8$ և $P(A \cap B) = 0,32$,
- 3) $P(A) = 0,5, P(B) = 0,3$ և $P(A \cup B) = 0,65$,
- 4) $P(A) = 0,4, P(B) = 0,2$ և $P(A \cap B) = 0$:

Լուծում

- 1) $P(A) \times P(B) = 0,16 \neq 0,2$, հետևաբար՝ A և B պատահույթներն անկախ չեն,
- 2) $P(A) \times P(B) = 0,32 = P(A \cap B)$, հետևաբար՝ A և B պատահույթներն անկախ են,
- 3) $P(A \cap B) = P(A) + P(B) - P(A \cup B) = 0,5 + 0,3 - 0,65 = 0,15$
- a) $P(A) \times P(B) = 0,15$, հետևաբար՝ A և B պատահույթներն անկախ են,
- 4) $P(A) \times P(B) = 0,08 \neq 0$, հետևաբար՝ A և B պատահույթներն անկախ չեն:

Առաջադրանքի նկարագիր և իրականացման ուղեցույց

Սովորողներն առաջադրանքը կատարում են զույգերով: Ուսուցիչը օգնում է ամենադժվարացող զույգերին: Առաջադրանքի ավարտին սովորողները շտկում են իրենց պատասխանները համադասարանական քննարկման ընթացքում, որի ժամանակ ուսուցիչը ներգրավում է առավելագույն թվով սովորողների: Երրորդ օրինակում սովորողները նախ պետք է հաշվեն $P(A \cap B)$ հավանականությունը միավորման բանաձևի միջոցով: Վերջին օրինակում ուսուցիչը շեշտում է, որ չնայած A և B պատահույթներն անհամատեղելի են, բայց նրանք կախյալ են:

ՁԵՎԱՎՈՐՈՂ ԳՆԱՀԱՏՈՒՄ (20 թույլ է)

Բաժնի ավարտին իրականացվում է ձևավորող գնահատում՝ գաղափարի ընկալման և ընթացիկ գիտելիքի վերաբերյալ: Էական է, որ ձևավորող գնահատումը համապատասխանի տվյալ բաժնի նպատակներին/վերջնարդյունքներին և ներառի ամբողջը: Այս գնահատումն արտացոլում է Գլուխ 3-ի Բաժին 1-ը: Կարևոր է իրականացնել թղթով և մատիտով գնահատում՝ սովորողների լուծման ընթացքին հետևելու և նրանց սխալ պատկերացումները բացահայտելու նպատակով:

Ստորև բերված է ձևավորող գնահատման օրինակ:

Խնդիր 1

Սափորում կա 10 գնդակ՝ 5 սև և 5 կարմիր: Թե սև, թե կարմիր գնդակները համարակալված են 1-ից մինչև 5 թվերով: Սափորից պատահականորեն հանում են մեկ գնդակ:

Դիտարկե՛ք հետևյալ պատահույթները.

$E = \{\text{հանել են զույգ թիվ}\}$,

$R = \{\text{հանել է կարմիր գնդակ}\}:$

1) Գտե՛ք $P(E)$, $P(R)$, $P(E \cap R)$, $P(E \cup R)$, $P(\bar{E})$ և $P(\bar{R})$:

2) Ստուգե՛ք, արդյոք E և R պատահույթներն անկախ են:

Խնդիր 2

Նետել են չկեղծված քառանիստ երկու զառ: P -ն ցույց է տալիս զառերի վրա բացված թվերի արտադրյալը:

1) Գծե՛ք նմուշների տարածությունը ներկայացնող աղյուսակը:

2) Գտե՛ք $P = 4$ պատահույթի հավանականությունը:

3) Գտե՛ք $P \geq 4$ պատահույթի հավանականությունը:

Խնդիր 3

Ավագ դպրոցի սովորողների 60%-ն ընդգրկված է «ԱԲ-սերունդ» ծրագրում: Եթե ուսանողն ընդգրկված է «ԱԲ-սերունդ» ծրագրում, հավանականությունը, որ նա կշարունակի իր ուսումն արհեստական բանականությանը, համակարգչային ծրագրավորմանը կամ համակարգչային ճարտարագիտությանն առնչվող ոլորտում, 65% է: Եթե սովորողն ընդգրկված չէ «ԱԲ-սերունդ» ծրագրում, հավանականությունը, որ նա կշարունակի իր ուսումը նշված ոլորտներում, 30% է: Պատահականորեն ընտրվել է մի սովորող:

Դիտարկե՛ք հետևյալ պատահույթները.

$G = \{\text{ընտրված սովորողն ընդգրկված է «ԱԲ-սերունդ» ծրագրում}\},$

$A = \{\text{ընտրված սովորողը շարունակելու է իր ուսումն արհեստական բանականության, համակարգչային ծրագրավորման կամ համակարգչային ճարտարագիտությանն առնչվող ոլորտում}\}:$

1) Գծե՛ք համապատասխան ծառածև դիագրամը:

2) Գտե՛ք հավանականությունը, որ ընտրված սովորողն ընդգրկված է «ԱԲ-սերունդ» ծրագրում և շարունակելու է իր ուսումն արհեստական բանականությանը, համակարգչային ծրագրավորմանը կամ համակարգչային ճարտարագիտությանն առնչվող ոլորտում:

3) Գտե՛ք հավանականությունը, որ ընտրված սովորողը շարունակելու է իր ուսումն արհեստական բանականությանը, համակարգչային ծրագրավորմանը կամ համակարգչային ճարտարագիտությանն առնչվող ոլորտում:

4) Գտե՛ք հավանականությունը, որ ընտրված սովորողն ընդգրկված է «ԱԲ-սերունդ», եթե նա գիտի, որ շարունակելու է իր ուսումն արհեստական բանականությանը, համակարգչային ծրագրավորմանը կամ համակարգչային ճարտարագիտությանն առնչվող ոլորտում:

ՄԱՔԵՄԱԹԻԿԱԿԱՆ ԿԱՐՈՂՈՒԹՅՈՒՆՆԵՐԻ ԳՆԱՀԱՏՈՒՄ

Կան այլ մաթեմատիկական կարողություններ, որ ուսուցիչը պետք է գնահատի տարբեր բաժինների ընթացքում՝ ռուբրիկ կամ սանդղակ օգտագործելով: Այս կարողություններից են հետազոտումը/փորձը, զանազան տեխնոլոգիական գործիքների կիրառումը, մաթեմատիկական մոդելավորումը, խնդիրների լուծումը, ներկայացումը, վերացական մտածողությունը, հաշվելը, մաթեմատիկորեն հաղորդակցվելը: Յուրաքանչյուր բաժնի ավարտին յուրաքանչյուր սովորողի հետ անհատապես կարելի է իրականացնել նմանատիպ գնահատում:

Կախված գնահատման արդյունքներից՝ ուսուցիչը կարող է յուրաքանչյուր սովորողի հետ անհատապես աշխատել ինքնուրույն կամ խմբային աշխատանքների ժամանակ՝ ուժեղացնելով անհրաժեշտ կարողությունները:

Տրված աղյուսակի օգնությամբ ուսուցիչը կարող է գնահատել յուրաքանչյուր սովորողի մաթեմատիկական կարողությունները:

	Առկա չէ	Պետք է բարելավել	Լավ	Գերազանց
Մաթեմատիկական մոդելավորում				
Խնդրի լուծում				
Ներկայացում				
Վերացական մտածողություն				
Հաշվում				
Մաթեմատիկորեն հաղորդակցում				
Տարբեր տեխնոլոգիական գործիքների փորձարկում				



ՏՆԱՅԻՆ ԱՇԽԱՏԱՆՔ

Հետևյալ խնդիրները հանձնարարել որպես տնային աշխատանք:

Գլուխ 5: Խնդիրներ 1, 2, 3, 4, 5, 6, 7, 8, 9 (էջ 166) հանձնարարել որպես տնային աշխատանք Կ. Առաքելյանի հեղինակած «Հանրահաշիվ և մաթեմատիկական անալիզի տարրեր 10» դասագրքից:

1. A և B պատահույթներն անհամատեղելի են և $P(A) = 0,2$, $P(B) = 0,5$:

ա. Գտե՛ք Վեննի դիագրամ՝ այս պատահույթները ցույց տալու համար:

բ. Գտե՛ք $P(A \cup B)$:

գ. Գտե՛ք $P(A' \cap B')$:

2. A և B պատահույթներն անկախ են և $P(A) = \frac{1}{4}$, $P(B) = \frac{1}{5}$:

Գտե՛ք

ա. $P(A \cap B)$:

բ. $P(A \cap B')$:

գ. $P(A' \cap B')$:

3. Q և R երկու պատահույթներ են, այնպես որ $P(Q) = 0,2$, $P(R) = 0,4$ և $P(Q' \cap R) = 0,4$:
Գտե՛ք.

ա. Q և R պատահույթների միջև կապը:

բ. $P(Q \cup R)$:

գ. $P(Q' \cap R')$:

4. Նետում են երկու կանոնավոր զառ և գրանցում դրանց վրա բացված թվերը: Ցույց տվե՛ք, որ բացված թվերի գումարը 4 է, և «երկու զառի վրա բացվում է նույն թիվը» պատահույթներն անհամատեղելի չեն:

5. Պարկում կա 3 կարմիր և 5 կապույտ գնդակ: Պատահականորեն ընտրում են մեկ գնդակ, գրանցում գույնը, գնդակը վերադարձնում պարկի մեջ: Հանում են երկրորդ գնդակը և գրանցում գույնը:

ա. Գտե՛ք հավանականությունը, որ երկու գնդակն էլ կապույտ են:

բ. Գտե՛ք հավանականությունը, որ երկրորդ գնդակը կապույտ է:.

6. Արկղում կա 24 էլեկտրական սարք, որից 4-ն անսարք են: Արկղից պատահականորեն ընտրում են երկու սարք: Գտե՛ք հավանականությունը, որ

ա. Կընտրեն 2 անսարք էլեկտրական սարք, եթե առաջին սարքը հանելուց հետո այն վերադարձրել են արկղի մեջ:

բ. Կընտրեն 2 անսարք էլեկտրական սարք, եթե առաջին սարքը հանելուց հետո այն չեն վերադարձրել արկղի մեջ:

գ. Կընտրեն 1 անսարք և 1 սարքին էլեկտրական սարք, եթե առաջինը հանելուց հետո չեն վերադարձրել արկղի մեջ:

7. Պարկում կա 1 կարմիր, 2 կապույտ և 3 կանաչ ժետոն: Պատահականորեն ընտրում են մեկ ժետոն, գրանցում գույնը, վերադաձնում պարկի մեջ և հանում երկրորդ ժետոնը:

ա. Գտե՛ք ծառածն դիագրամ՝ ցույց տալով բոլոր հնարավոր ելքերը:

Գտե՛ք հավանականությունը, որ

բ. երկուսն էլ ունեն նույն գույնը,

գ. երկուսն էլ ունեն տարբեր գույններ:

8. Փոլն ու Ջիլը որոշեցին սեղանի խաղ խաղալ: Փոլի հաղթելու հավանականությունը 0,25 է, իսկ Ջիլինը՝ 0,3: Նրանք որոշեցին խաղալ 3 անգամ: Տրված է, որ խաղի արդյունքներն իրարից անկախ են: Գտե՛ք հավանականությունը, որ

ա. Փոլը 3 խաղն էլ կհաղթի:

բ. Բոլոր խաղերում կգրանցվի ոչ-ոքի:

գ. Ջիլը կհաղթի 2 անգամ, իսկ Փոլը՝ 1:

գ. Երկուսն էլ կհաղթեն մեկական անգամ:

(Առաջադրանքները Տավուշի մարզում նոր չափորոշիչների փորձարկման համար մշակված 10-րդ դասարանի «Հանրահաշիվ և մաթեմատիկական անալիզի տարրեր» առարկայի խորացված ծրագրի ուսումնական նյութերից են:)

Բաժին 2: Պատահական մեծություններ, բաշխման օրենք, մաթեմատիկական սպասում և դիսպերսիա

Դասերի քանակը՝ 4

Դասեր

- 1) Դիսկրետ պատահական մեծություններ և բաշխման օրենք:
- 2) Մաթեմատիկական սպասում և պատահական մեծության դիսպերսիա:
- 3) Մաթեմատիկական սպասման և դիսպերսիայի հատկությունները:
- 4) Դիսկրետ հավասարաչափ բաշխում:

Նպատակներ

Դիսկրետ պատահական մեծությունների, դրանց մաթեմատիկական սպասման, դիսպերսիայի ու բաշխումների ուսումնասիրումը:

Վերջնարդյունքներ

- Իմանա և կիրառի դիսկրետ պատահական մեծությունների հատկությունները, հաշվի դրանց մաթեմատիկական սպասումը, դիսպերսիան, կազմի դրանց բաշխման աղյուսակը:
- Իմանա և կիրառի դիսկրետ հավասարաչափ բաշխման մաթեմատիկական սպասման և դիսպերսիայի բանաձևերը, հաշվի հավանականություններ:
- Կատարի պատահականության հավանականության հաշվարկներ և գնահատում ֆինանսական որոշումներ կայացնելիս:
- Սահմանի դիսկրետ պատահական մեծություններ:
- Գտնի պատահական մեծության հնարավոր արժեքները:
- Որոշի պատահական մեծության բաշխման օրենքը:
- Սահմանի պատահական մեծության մաթեմատիկական սպասումը, դիսպերսիան և ստանդարտ շեղումը:
- Հաշվի պատահական մեծության մաթեմատիկական սպասումը և դիսպերսիան:
- Սահմանի դիսկրետ հավասարաչափ բաշխված մեծություններ:
- Կիրառի դիսկրետ հավասարաչափ բաշխված մեծությունների մաթեմատիկական սպասման և դիսպերսիայի բանաձևերը:
- Արտաձի $E(aX + b)$ և $Var(aX + b)$ բանաձևերը:
- Կիրառի $E(aX + b)$ և $Var(aX + b)$ բանաձևերը:

Ակնկալվող գիտելիք

Կիրառի հավանականության վերաբերյալ նախնական գիտելիքները:

Գծի և կիրառի ծառաձև դիագրամներ:

Մեթոդաբանություն

Դաս 1: Դիսկրետ պատահական մեծություններ և բաշխման օրենք

ՆՅՈՒԹԻ ՄԱՏՈՒՑՈՒՄ ԵՎ ՉՈՒՅԳԵՐՈՎ ԱՇԽԱՏԱՆՔ (ՄՈՏ 20 ՐՈՊԵ)

Նպատակներ

Սահմանել դիսկրետ պատահական մեծություններ:

Գտնել պատահական մեծության հնարավոր արժեքները:

Առաջադրանքի նկարագիր և իրականացման ուղեցույց

Առաջադրանքի ընթացքում ուսուցիչը ծանոթացնում է պատահական մեծություններին: Դիցուք՝ Ω -ն պատահական փորձի արդյունքում ստացված նմուշային տարածությունն է: Պատահական մեծությունը Ω -ի վրա որոշված ֆունկցիա է, որի պատկերը R -ի ենթաբազմություն է: Դիսկրետ պատահական մեծություն կոչվում է այն պատահական մեծությունը, որի նմուշային տարածությունը բաղկացած է հաշվելի թվով էլեմենտներից: Դիսկրետ պատահական մեծությունը հաճախ, բայց ոչ միշտ, հանդիսանում է դրական ամբողջ թիվ: Ուսուցիչը մի քանի օրինակ է բերում:

Դիցուք՝ 4 կարմիր և 5 կապույտ գնդակ պարունակող սափորից հաջորդաբար և վերադարձով հանում են երկու գնդակ: Պատահական մեծությունը կարող է ցույց տալ դուրս եկած կարմիր գնդակների քանակը: Հնարավոր արժեքներն են 0, 1 և 2: Ուսուցիչը որոշակի ժամանակ տրամադրում է՝ հնարավոր արժեքները գտնելու մեթոդը բացատրելու համար:

Մեկ այլ օրինակ է երկու մետաղադրամ նետելը: Ըստ խաղի կանոնների՝ յուրաքանչյուր անգամ գիր բացվելիս մասնակիցը վաստակում է 500 միավոր, իսկ զինանշան բացվելիս կորցնում է 200 միավոր: Պատահական մեծությունը ցույց է տալիս վաստակելու (կորցնելու) քանակը խաղի ընթացքում: Ուսուցիչը նշում է, որ շահույթը կարող է բացասական արժեք ունենալ, ինչը վկայում է կորցնելու մասին:

Սովորողները պետք է մտածեն բոլոր հնարավոր տարբերակների մասին: Ուսուցիչը տալիս է սովորողներին մի քանի րոպե ժամանակ՝ զույգերով աշխատելու համար: Այնուհետև, նրանք կիսվում են իրենց պատասխաններով դասարանական քննարկման ընթացքում: Սովորողները նախ որոշում են նմուշային տարածությունը: Հնարավոր է՝ անհրաժեշտ լինի կազմել ծառաձև դիագրամ: Երկու մետաղադրամ նետելու նմուշային տարածությունը որոշելուց հետո սովորողները յուրաքանչյուր ելքին վերագրում են համապատասխան արժեք. երկու գիր՝ 1000 միավոր, մի գիր, մի զինանշան՝ 300 միավոր, երկու զինանշան՝ 400 միավոր: Եթե զույգերը դժվարանում են գտնել այդ արժեքները, ուսուցիչը հուշում է կամ ցույց է տալիս առաջին հնարավոր արժեքը գտնելու տարբերակը և հանձնարարում զույգերով հաշվել մյուս արժեքները:


Այսպիսով ուսուցիչը բացատրում է, որ հնարավոր է այդ արժեքները գրառել ստորև բերված աղյուսակում:

$X = a$			
$P(X = a)$			

Աղյուսակը կոչվում է X մեծության բաշխման օրենք կամ հավանականությունների բաշխում: $P(X = a)$ - ն կոչվում է հավանականությունների ֆունկցիա: Առաջին օրինակի միջոցով ուսուցիչը ցույց է տալիս՝ ինչպես լրացնել աղյուսակը: Պատահական մեծության հնարավոր արժեքներն են 0, 1, 2: Հետևաբար՝ առաջին տողում գրում են այդ արժեքները:

$X = a$	0	1	2
$P(X = a)$			

Այնուհետև, նրանք գտնում են յուրաքանչյուր ելքի հավանականությունը: Ուսուցիչն առաջարկում է կազմել ծառածառ դիագրամ՝ հավանականությունները հեշտությամբ գտնել համար:



Ծառածառ դիագրամից գտնում են՝ $P(X = 0) = P(B_1 \cap B_2) = \frac{25}{81}$,

$P(X = 1) = P(R_1 \cap B_2) + P(B_1 \cap R_2) = \frac{40}{81}$,


$P(X = 2) = P(R_1 \cap R_2) = \frac{16}{81}$:

Այնուհետև, սովորողները լրացնում են հետևյալ աղյուսակը.

$X = a$	0	1	2
---------	---	---	---

$P(X = a)$	$\frac{25}{81}$	$\frac{40}{81}$	$\frac{16}{81}$
------------	-----------------	-----------------	-----------------

Առաջին օրինակի ավարտին սովորողները ստուգում են հավանականությունների գումարի՝ 1-ի հավասար լինելը: Այնուհետև, ուսուցիչը որոշակի ժամանակ է տալիս, որպեսզի սովորողներն աշխատեն զույգերով և գրեն երկրորդ օրինակի բաշխման օրենքը: Այս ընթացքում ուսուցիչն օգնում է դժվարացող սովորողներին: Հնարավոր է, որ կարիք լինի նորից բացատրել նախորդ օրինակը: Վերջացնելուն պես նրանք կիսվում են իրենց պատասխաններով դասարանական քննարկման ընթացքում: Սովորողները նախ կազմում են ծառածախ դիագրամ:



Ապա՝ հաշվում են յուրաքանչյուր ելքի հավանականությունը:

Ծառածախ դիագրամից գտնում են՝ $P(X = -400) = P(T_1 \cap T_2) = \frac{1}{4}$,

$P(X = 300) = P(H_1 \cap T_2) + P(T_1 \cap H_2) = \frac{1}{2}$,

$P(X = 1000) = P(T_1 \cap T_2) = \frac{1}{4}$:

Օրինակի ավարտին սովորողները լրացնում են աղյուսակում համապատասխան բաշխման օրենքը:

$X = a$	-400	300	1000
$P(X = a)$	0,25	0,5	0,25

Սովորողները ստուգում են հավանականությունների գումարի՝ 1-ի հավասար լինելը:

ԻՆՔՆՈՒՐՈՒՅՆ ԱՇԽԱՏԱՆՔ (ՄՈՏ 20 ՐՈՊԵ)

Նպատակներ

Որոշել պատահական մեծության բաշխման օրենքը:

Գտնել պատահական մեծության հնարավոր արժեքները:

Առաջադրանք

Խաղը կազմված է գիտության և արվեստի վերաբերյալ հավասար քանակով խաղաքարտերից: Մասնակիցները գիտեն, որ գիտության խաղաքարտ վերցնելու դեպքում 0,75 հավանականությամբ կտան ճիշտ պատասխան: Սակայն, եթե վերցնեն արվեստի քարտ, ապա ճիշտ պատասխանելու հավանականությունը 0,2 է: Դիցուք՝ S-ով նշանակենք այն պատահույթը, որ ընտրված խաղաքարտը գիտության վերաբերյալ է, իսկ R-ով, որ մասնակիցը ճիշտ է պատասխանել: Խաղին մասնակցելու համար վճարում են 500 դրամ: Եթե գիտության վերաբերյալ հարցին ճիշտ են պատասխանել, վաստակում են 1000 դրամ, իսկ արվեստի վերաբերյալ հարցին ճիշտ պատասխանելու համար՝ 2000 դրամ, իսկ սխալ պատասխանելու դեպքում ոչինչ չեն ստանում կամ կորցնում:

Դիցուք՝ X պատահական մեծությամբ նշանակված է մասնակիցների շահույթը:


1) Գծե՛ք համապատասխան ծառածև դիագրամը:

2) Գտե՛ք X-ի հնարավոր արժեքները:

3) Գտե՛ք X-ի բաշխման օրենքը:

Լուծում

1)



2) $X = \{-500, 500, 1500\}$:

$$3) P(X = -500) = P(S \cap \bar{R}) + P(\bar{S} \cap \bar{R}) = 0,525,$$

$$P(X = 500) = P(S \cap R) = 0,375,$$

$$P(X = 1500) = P(\bar{S} \cap R) = 0,1:$$

$X = a$	-500	500	1500
$P(X = a)$	0,525	0,375	0,1

Առաջադրանքի նկարագիր և իրականացման ուղեցույց

Սովորողներն աշխատում են ինքնուրույն: Դժվարանալու դեպքում սովորողներն աշխատում են զույգերով, որոնք կազմվում են հետևյալ կերպ՝ ամենաարագն ավարտած սովորողն ամենադժվարացողի հետ մոտեցմամբ: Ուսուցիչը կարող է հարցնել, թե ով օգնության կարիք ունի և ընտրել սովորողի, որը կօգնի դժվարացողներին, կամ ուսուցիչն ինքը կարող է օգնել: Առաջադրանքի ավարտին սովորողները կիսվում են իրենց պատասխաններով դասարանական քննարկման ժամանակ: Որոշ սովորողներ հնարավոր է դժվարանան հնարավոր արժեքները գտնելիս: Ուսուցիչը օգնում է՝ հուշելով, որ նրանք պետք է հաշվեն վաստակած գումարը և հանեն մասնակցության վճարը:



ՏՆԱՅԻՆ ԱՇԽԱՏԱՆՔ

Հետևյալ խնդիրները հանձնարարել որպես տնային աշխատանք:

Գլուխ 5: Խնդիրներ 10, 11, 12, 13, 14, 15 (Էջ 166) հանձնարարել որպես տնային աշխատանք Կ. Առաքելյանի հեղինակած «Հանրահաշիվ և մաթեմատիկական անալիզի տարրեր 10» դասագրքից:

Առաջադրանք 1

1. Գտե՛ք, թե հետևյալ պատահական մեծություններից ո՞րն է դիսկրետ, որը՝ ոչ: Պատասխանը հիմնավորել:

ա. Մարտկոցի կյանքի տևողությունը:

բ. Շաբաթվա օրերի քանակը:

գ. Շախմատում հաղթելու համար պահանջվող քայլերի թիվը:

2. Չկեղծված գառը նետում են 4 անգամ և բացված 6 թվերի քանակը գրանցում որպես Y : Գրե՛ք Y -ի բոլոր հնարավոր արժեքները:

3. Պայուսակում կա 4 սկավառակ, որոնցից 2-ի վրա գրված է 2 թիվը, իսկ մյուս երկուսի վրա՝ 3 թիվը: Պայուսակից պատահականորեն հանում են մեկ սկավառակ, գրանցում

դրա վրա գրված թիվը և սկավառակը վերադարձնում պայուսակի մեջ: Հանում են երկրորդ սկավառակը և գրանցում վրայի թիվը:

ա. Գրե՛ք նմուշների տարածությունը. X դիսկրետ պատահական մեծությամբ նշանակված է այդ երկու թվերի գումարը:

բ. Գտե՛ք X -ի հավանականությունների բաշխումը:

գ. Գտե՛ք X -ի հավանականության ֆունկցիան:

4. X դիսկրետ պատահական մեծությունն ունի հետևյալ հավանականությունների բաշխումը.

x	1	2	3	4
$P(X = x)$	$\frac{1}{3}$	$\frac{1}{3}$	k	$\frac{1}{4}$

Գտե՛ք k -ն:

5. X պատահական մեծությունն ունի հետևյալ հավանականության ֆունկցիան.

$$P(X = x) = kx, x = 1, 2, 3, 4:$$

Ցույց տվե՛ք, որ $k = \frac{1}{10}$

6. X պատահական մեծությունն ունի հետևյալ հավանականության ֆունկցիան.

$$P(X = x) = \frac{x-1}{10}, x = 1, 2, 3, 4, 5:$$

Աղյուսակով ներկայացրե՛ք X -ի հավանականությունների բաշխումը:

7. X պատահական մեծությունն ունի հետևյալ հավանականության ֆունկցիան.

$$P(X = x) = \begin{cases} kx & x = 1, 3 \\ k(x - 1) & x = 2, 4, \end{cases} \text{ որտեղ } k \text{ -ն հաստատուն է:}$$

ա. Գտե՛ք k -ն:

բ. Աղյուսակով ներկայացրե՛ք X -ի հավանականությունների բաշխումը:

8. X դիսկրետ պատահական մեծությունն ունի հետևյալ հավանականությունների բաշխումը.

x	0	1	2
$P(X = x)$	$\frac{1}{4} - a$	a	$\frac{1}{2} + a$

Գտե՛ք a -ն:

Առաջադրանք 2

1. Դիսկրետ պատահական մեծությունն ունի հետևյալ հավանականությունների բաշխումը.

x	0	1	2	3	4	5
-----	---	---	---	---	---	---

$P(X = x)$	0,1	0,1	0,3	0,3	0,1	0,1
------------	-----	-----	-----	-----	-----	-----

ա. Գտե՛ք հավանականությունը, որ $X < 3$:

բ. Գտե՛ք հավանականությունը, որ $X > 3$:

գ. Գտե՛ք հավանականությունը, որ $1 < X < 4$:

2. X դիսկրետ պատահական մեծությունն ունի հետևյալ հավանականությունների բաշխումը.

x	0	1	2	3
$P(X = x)$	$\frac{1}{8}$	$\frac{1}{4}$	$\frac{1}{2}$	$\frac{1}{8}$

ա. Գտե՛ք $P(1 < X \leq 3)$:

բ. Գտե՛ք $P(X < 2)$

3. X դիսկրետ պատահական մեծությունն ունի հետևյալ հավանականությունների բաշխումը.

x	1	2	3	4	5	6
$P(X = x)$	0,1	0,1	0,15	0,25	0,3	0,1

ա. Կազմե՛ք $F(x) = P(X \leq x)$ կումուլյատիվ բաշխման ֆունկցիայի աղյուսակը:

բ. Հաշվե՛ք $F(5)$ արժեքը:

գ. Հաշվե՛ք $F(2, 2)$ արժեքը:

4. Դիսկրետ պատահական մեծության $F(x) = P(X \leq x)$ կումուլյատիվ բաշխման ֆունկցիան ներկայացված է հետևյալ աղյուսակում.

x	0	1	2	3	4	5	6
$F(x)$	0	0,1	0,2	0,45	0,5	0,9	1

ա. Բերե՛ք X -ի հավանականությունների բաշխման աղյուսակը:

բ. Հաշվե՛ք $P(X < 5)$ արժեքը:

գ. Հաշվե՛ք $P(2 \leq X < 5)$ արժեքը:

5. X պատահական մեծությունն ունի հետևյալ բաշխման ֆունկցիան.

$$P(X = x) = \begin{cases} kx, & x = 1, 3, 5 \\ k(x - 1), & x = 2, 4, 6 \end{cases}$$

որտեղ k -ն հաստատուն է:

ա. Գտե՛ք k -ի արժեքը:

բ. Գծե՛ք X -ի հավանականությունների բաշխման աղյուսակը:

գ. Հաշվե՛ք $P(2 \leq X < 5)$:

դ. Գտե՛ք $F(4)$ արժեքը:

ե. Գտե՛ք $F(1, 6)$ արժեքը:

6. X դիսկրետ պատահական մեծությունն ունի հետևյալ հավանականության ֆունկցիան.

$$P(X = x) = \begin{cases} 0, 1, & x = -2, -1 \\ \alpha, & x = 0, 1 \\ 0, 3, & x = 2 \end{cases}$$

ա. Գտե՛ք α -ի արժեքը:

բ. Գծե՛ք X -ի հավանականությունների բաշխման աղյուսակը:

գ. Գտե՛ք $F(0, 3)$ արժեքը:

7. X դիսկրետ պատահական մեծությունն ունի հետևյալ գումարային հավանականության ֆունկցիան.

$$F(x) = \begin{cases} 0, & x = 0 \\ \frac{(x+k)^2}{16}, & x = 1, 2, 3 \\ 1, & x > 5 \end{cases}$$

ա. Գտե՛ք k -ի արժեքը:

բ. Գծե՛ք X -ի հավանականությունների բաշխումը

(Առաջադրանքները Տավուշի մարզում նոր չափորոշիչների փորձարկման համար մշակված 10-րդ դասարանի «Հանրահաշիվ և մաթեմատիկական անալիզի տարրեր» առարկայի խորացված ծրագրի ուսումնական նյութերից են:)

Դաս 2: Մաթեմատիկական սպասում և պատահական մեծության դիսպերսիա

ՆՅՈՒԹԻ ՄԱՏՈՒՑՈՒՄ ԵՎ ՉՈՒՅԳԵՐՈՎ ԱՇԽԱՏԱՆՔ (ՄՈՏ 20 ԲՈՊԵ)

Նպատակներ

Սահմանել պատահական մեծության մաթեմատիկական սպասումը, դիսպերսիան և ստանդարտ շեղումը:

Հաշվել պատահական մեծության մաթեմատիկական սպասումը և դիսպերսիան:

Առաջադրանքի նկարագիր և իրականացման ուղեցույց

Պատահական մեծության մաթեմատիկական սպասումը փորձի միջին արդյունքն է: Օրինակ՝ նախորդ դասի օրինակներում, որտեղ X պատահական մեծությունը ցույց էր տալիս կարմիր գնդակների քանակը, մաթեմատիկական սպասումը կարմիր գնդակների դուրս գալու միջին թիվն է: Նույններապ, երբ X -ով նշանակված էր խաղի արդյունքում ստացած շահույթը, $E(X)$ -ը միջին շահույթն է, որ մասնակիցը կարող է ունենալ: Ինչու՞ է կարևոր իմանալ $E(X)$ -ի արժեքը: Որովհետև նույն խաղը կամ փորձը բազմիցս կրկնելու դեպքում արդյունքների միջին թվաբանականը կկենտրոնանա $E(X)$ -ի արժեքի շուրջ:

$E(X)$ -ի բանաձևն է $E(X) = p_1 x_1 + p_2 x_2 + p_3 x_3 + \dots$

Օրինակ՝ նախորդ դասի երկրորդ օրինակում ունեինք բաշխման հետևյալ օրենքը.

$X = a$	-400	300	1000
$P(X = a)$	0,25	0,5	0,25

Մաթեմատիկական սպասումը կլինի.

$$E(X) = p_1 \cdot x_1 + p_2 \cdot x_2 + p_3 \cdot x_3 = 0,25 \times (-400) + 0,5 \times 300 + 0,25 \times 1000 = 300:$$

Հետևաբար՝ միջին շահույթը, որ կարող ենք ունենալ այս խաղում 300 է: Ուսուցիչը տալիս է մի քանի թույլ ժամանակ, որպեսզի սովորողները գտնեն նախորդ դասի երրորդ օրինակի մաթեմատիկական սպասումը:

$X = a$	-500	500	1500
$P(X = a)$	0,525	0,375	0,1

Մաթեմատիկական սպասումը կլինի.

$$E(X) = P_1 \cdot x_1 + P_2 \cdot x_2 + P_3 \cdot x_3 = -500 \times 0,525 + 500 \times 0,375 + 0,1 \times 1500 = 75:$$

Ուսուցիչը բացատրում է, որ կարևոր է նաև իմանալ, թե որքանով են տարբեր արժեքները մոտ մաթեմատիկական սպասմանը: Որոշ սովորողներ կառաջարկեն

գտնել յուրաքանչյուր արժեքի և մաթեմատիկական սպասման տարբերությունների միջինը: Սակայն տարբերության դեպքում բացասական և դրական արժեքները կկրճատվեն, և դա հստակ ցուցանիշ չի լինի: Դա է պատճառը, որ ավելի նպատակահարմար է գտնել այդ տարբերությունների քառակուսիների միջին թվաբանականը: Արդյունքը, որ ստանում ենք, կարելի է մոտարկել դիսպերսիայի՝ $Var(X) = E(X^2) - (E(X))^2$ բանաձևով: Դիսպերսիայից քառակուսի արմատ հանելով՝ ստանում ենք σ ստանդարտ շեղումը, վերջինս արտահայտում է մաթեմատիկական սպասումից պատահական մեծության ունեցած ցրվածությունը: Այսպիսով, $\sigma = \sqrt{Var(X)}$: Այնուհետև, նախորդ օրինակի վրա ուսուցիչը ցույց է տալիս $E(X^2)$ -ի հաշման եղանակը: Նա ստանում է.

$X = a$	- 400	300	1000
X^2	160000	9000	1000000
$P(X = a)$	0,25	0,5	0,25

որտեղից $E(X^2) = 160000 \times 0,25 + 9000 \times 0,5 + 1000000 \times 0,25 = 335000$:

Ապա՝ կիրառում է $Var(X) = E(X^2) - E(X)^2 = 245000$ բանաձևը:

Հաջորդիվ, հաշվում է դիսպերսիայի քառակուսի արմատը և գտնում ստանդարտ շեղումը. $\sigma = \sqrt{Var(X)} \approx 495$: Հետևաբար՝ միջինում հնարավոր արժեքները 495 դրամով տարբերվում են սպասվող արժեքից: Սա գաղափար է տալիս արժեքների ցրման մասին:

Ուսուցիչը բացատրում է, որ հաշվարկներն արագացնելու համար սովորողները կարող են օգտագործել հաշվիչներ, Excel կամ Python ծրագրերը: Սա նաև կբարելավի սովորողների համակարգչային գրագիտությունը: Այնուհետև, ուսուցիչը որոշ ժամանակ է տալիս, որպեսզի սովորողներն աշխատեն զույգերով և գտնեն մաթեմատիկական սպասումը, դիսպերսիան և ստանդարտ շեղումը երկրորդ օրինակի դեպքում: Այս ընթացքում ուսուցիչը օգնում է դժվարացող սովորողներին: Հնարավոր է՝ նպատակահարմար լինի նորից բացատրել նախորդ օրինակը: Վերջում նրանք կհսկում են իրենց պատասխաններով դասարանական քննարկման ընթացքում: Սովորողները ստանում են.

$X = a$	-500	500	1500
X^2	250000	250000	2250000
$P(X = a)$	0,525	0,375	0,1

Ապա՝ նրանք հաշվում են.

$$E(X^2) = 250000 \times 0,525 + 250000 \times 0,375 + 2250000 \times 0,1 = 450000:$$

Կիրառելով դիսպերսիայի բանաձևը՝ ստանում են.

$$Var(X) = E(X^2) - E(X)^2 = 450000 - 5625 = 444375:$$

Հաջորդիվ, սովորողները քառակուսի արմատ են հանում դիսպերսիայի արժեքից և գտնում ստանդարտ շեղումը՝ $\sigma = \sqrt{E(X)} \approx 667$:

ԻՆՔՆՈՒՐՈՒՅՆ ԱՇԽԱՏԱՆՔ (ՄՈՏ 20 ՐՈՊԵ)

Նպատակներ

Որոշել պատահական մեծության բաշխման օրենքը:

Գտնել պատահական մեծության հնարավոր արժեքները:

Հաշվել պատահական մեծության մաթեմատիկական սպասումը և դիսպերսիան:

Կատարել պատահականության հավանականության հաշվարկներ և գնահատում ֆինանսական որոշումներ կայացնելիս:

Առաջադրանք

Խնդիր 1

Սափորում կա 6 սև և 3 կարմիր գնդակ: Սափորից հաջորդաբար և վերադարձով պատահականորեն վերցնում են երկու գնդակ: Կարմիր գնդակի ընտրվելու դեպքում շահում ենք 300 դրամ, իսկ սև գնդակի ընտրվելու դեպքում կորցնում ենք 100 դրամ: Դիցուք՝ X -ով նշանակված է ընտրված կարմիր գնդակների քանակը ցույց տվող պատահական մեծությունը:

Դիցուք՝ Y -ով նշանակված է շահույթը ցույց տվող պատահական մեծությունը:

1) Գծե՛ք համապատասխան ծառածև դիագրամը:

2) Գտե՛ք X -ի հնարավոր արժեքները:

3) Գտե՛ք Y -ի հնարավոր արժեքները:

4) Գրե՛ք Y -ի բաշխման օրենքը:

5) Գտե՛ք $E(Y)$:

6) Գտե՛ք $Var(Y)$: Այնուհետև՝ հաշվե՛ք Y -ի ստանդարտ շեղումը՝ σ :


Խնդիր 2

Ապահովագրական ընկերությունը \$450 արժեքով վաճառում է \$10000 արժողությամբ կյանքի ապահովագրման փաթեթ այն անձանց, ովքեր 97% հավանականությամբ կապրեն մեկ տարի: Որքա՞ն գումար է ակնկալում տարեկան վաստակել ընկերությունը մեկ նման փաթեթի վաճառքից:

Լուծում

Խնդիր 1

1)



2) $X = \{0, 1, 2\}$,

3) $Y = \{-200, 200, 600\}$,

4)

$X = a$	- 200	200	600
$P(X = a)$	$\frac{4}{9}$	$\frac{4}{9}$	$\frac{1}{9}$

1) $E(Y) = \frac{200}{3} = 66,67$

$X = a$	- 200	200	600
X^2	40000	40000	360000
$P(X = a)$	$\frac{4}{9}$	$\frac{4}{9}$	$\frac{1}{9}$

2) $E(Y^2) = \frac{680000}{9} = 75555,6$,

$Var(Y) = E(Y^2) - (E(Y))^2 = 75555,6 - 4444,89 = 71110,71$,

$\sigma(Y) = \sqrt{Var(Y)} = 266,67$:

Խնդիր 2

$X = a$	450	-9550
$P(X = a)$	0,97	0,03

$E(X) = 450 \times 0,97 - 9550 \times 0,03 = \150

Ապահովագրական ընկերությունը յուրաքանչյուր նման վաճառքից ակնկալում է վաստակել \$150:

Առաջադրանքի նկարագիր և իրականացման ուղեցույց

Սովորողներն աշխատում են ինքնուրույն: Դժվարանալու դեպքում սովորողներն աշխատում են զույգերով, որոնք կազմվում են հետևյալ կերպ՝ ամենաարագն ավարտած սովորողն ամենադժվարացողի հետ մոտեցմամբ: Ուսուցիչը կարող է հարցնել, թե ով օգնության կարիք ունի և ընտրել սովորողի, որը կօգնի դժվարացողներին, կամ ուսուցիչն ինքը կարող է օգնել: Առաջադրանքի ավարտին սովորողները կիսվում են իրենց պատասխաններով դասարանական քննարկման ժամանակ: Առաջին երկու մասերի նպատակն է սովորողների համար հստակ դարձնել պատահական մեծության սահմանում իրական կյանքին առընչվող խնդրի համատեքստում: Այն նաև օգնում է ուսուցչին ներկայացնել տարբեր պատահական մեծությունների առնչության գաղափարը, որը կօգտագործվի հաջորդ դասում: Շատ դեպքերում սովորողներն ուղղակի տրամաբանությունից ելնելով են սահմանում պատահական մեծությունները, ինչն անընդունելի է, քանի որ որոշ իրավիճակներում հնարավոր է սահմանել տարբեր պատահական մեծություններ: Երկրորդ խնդրում սովորողները հնարավոր է դժվարանան հնարավոր արժեքները գտնել: Ուսուցիչը կարող է որոշ հուշումներ տալ: Այս խնդիրը օրինակ է ֆինանսական մաթեմատիկայից և նպաստում է սովորողներին հասկանալ հավանականությունների և մաթեմատիկական սպասման վրա հիմնված որոշումներ կայացնելու և գների ընտրության կարևորությունը:



ՏՆԱՅԻՆ ԱՇԽԱՏԱՆՔ

Հետևյալ խնդիրները հանձնարարել որպես տնային աշխատանք:

Գլուխ 5: Խնդիրներ 16, 17 (էջ 169) հանձնարարել որպես տնային աշխատանք Կ. Առաքելյանի հեղինակած «Հանրահաշիվ և մաթեմատիկական անալիզի տարրեր 10» դասագրքից:

Առաջադրանք 1

1. X -ի հետևյալ բաշխումների համար հաշվե՛ք $E(X)$ և $E(X^2)$:

ա.

x	2	4	6	8
$P(X = x)$	0,3	0,3	0,2	0,2

բ.

x	1	2	3	4
$P(X = x)$	0,1	0,4	0,1	0,4

գ. Ոչ կանոնավոր զառն ունի հետևյալ հավանականությունների բաշխումը.

x	1	2	3	4	5	6
$P(X = x)$	0,1	0,1	0,1	0,2	0,4	0,1

Հաշվե՛ք $E(X)$ և $E(X^2)$:

2. X պատահական մեծությունն ունի հետևյալ հավանականության ֆունկցիան.

$$P(X = x) = \begin{cases} \frac{1}{x}, & x = 2, 3, 6 \\ 0, & \text{մնացած արժեքների համար} \end{cases}$$

ա. Կազմե՛ք X -ի հավանականությունների բաշխման աղյուսակը:

բ. Հաշվե՛ք $E(X)$ և $E(X^2)$:

գ. Մեկնաբանե՛ք՝ արդյոք $[E(X)]^2 = E(X^2)$:

3. Երկու մետաղադրամ նետում են 50 անգամ և գրանցվում են, թե քանի անգամ է գիր բացվել:

ա. Կազմե՛ք գիր բացվելու քանակի հավանականությունների բաշխման աղյուսակը՝ ենթադրելով, որ երկու մետաղադրամները նետվում են միաժամանակ և կեղծված չեն:

բ. Հաշվե՛ք, թե ինչ հաճախականությամբ եք սպասում, որ գիր կբացվի 0, 1 կամ 2 անգամ:

Գիր բացվելու քանակ (Գ)	0	1	2
Հաճախականություն (f)	7	22	21

գ. Ստուգե՛ք, թե արդյոք իրական հաճախականությունները հիմնավորում են, որ մետաղադրամները կեղծված չեն: Պատասխանը հիմնավորել:

4. X պատահական մեծությունն ունի հետևյալ հավանականությունների բաշխումը.

x	1	2	3	4	5
$P(X = x)$	0,1	a	b	0,2	0,1

Գտե՛ք a և b -ն, եթե $E(X) = 2,9$:

5. Հինգ բաժին ունեցող կանոնավոր պտուտակի նիստերի վրա գրված են 1-ից 5 թվերը: Պտուտակը պտտում են 500 անգամ: Հաշվարկներով ցույց տվե՛ք, թե քանի անգամ եք սպասում, որ կբացվի 3 թիվը:

Առաջադրանք 2

1. Տրված է հետևյալ հավանականությունների բաշխումը:

x	-1	0	1	2	3
$P(X = x)$	$\frac{1}{5}$	$\frac{1}{5}$	$\frac{1}{5}$	$\frac{1}{5}$	$\frac{1}{5}$

ա. Գտե՛ք $E(X)$:

2. Հետևյալ X պատահական մեծությունների հավանականությունների բաշխման համար գտե՛ք մաթեմատիկական սպասումն ու դիսպերսիան:

ա.

x	1	2	3
$P(X = x)$	$\frac{1}{3}$	$\frac{1}{2}$	$\frac{1}{6}$

բ.

x	-1	0	1
$P(X = x)$	$\frac{1}{4}$	$\frac{1}{2}$	$\frac{1}{4}$

գ.

x	-2	-1	1	2
$P(X = x)$	$\frac{1}{3}$	$\frac{1}{3}$	$\frac{1}{6}$	$\frac{1}{6}$

3. Y -ը կանոնավոր զառը նետելիս բացված թիվն է: Գտե՛ք $E(Y)$ և $Var(Y)$:

4. Երկու կանոնավոր խորանարդաձև զառերի վրա բացված թվերի S գումարի համար.

ա. Գտե՛ք S -ի բաշխումը:

բ. Գտե՛ք $E(S)$:

գ. Գտե՛ք $Var(S)$:

5. Նետում են երկու կանոնավոր քառանիստ զառ: D -ն բացված թվերի դրական տարբերությունն է:

ա. Գտե՛ք D -ի բաշխումը և ցույց տվե՛ք, որ $P(D = 3) = \frac{1}{8}$:

բ. Գտե՛ք $E(D)$:

գ. Գտե՛ք $Var(D)$:

6. Կանոնավոր մետաղադրամը նետում են այնքան, մինչև բացվի գինանշան կամ մինչև երեք նետում անելը: T պատահական մեծությունը ցույց է տալիս նետումների քանակը:

ա. Ցույց տվեք, որ T -ն ունի հետևյալ բաշխումը.

t	1	2	3
$P(T = t)$	$\frac{1}{2}$	$\frac{1}{4}$	$\frac{1}{4}$

բ. Գտե՛ք T -ի սպասումն ու դիսպերսիան:

7. X պատահական մեծությունն ունի հետևյալ բաշխումը.

x	1	2	3
$P(X = x)$	a	b	a

Որտեղ a և b հաստատուններ են:

ա. Գտե՛ք $E(X)$ -ի արտահայտությունը:

բ. Գտե՛ք a և b , եթե $Var(X) = 0,75$:

(Առաջադրանքները Տավուշի մարզում նոր չափորոշիչների փորձարկման համար մշակված 10-րդ դասարանի «Հանրահաշիվ և մաթեմատիկական անալիզի տարրեր» առարկայի խորացված ծրագրի ուսումնական նյութերից են:)

Դաս 3: Մաթեմատիկական սպասման և դիսպերսիայի հատկությունները

ՆՅՈՒԹԻ ՄԱՏՈՒՑՈՒՄ ԵՎ ՉՈՒՅԳԵՐՈՎ ԱՇԽԱՏԱՆՔ (ՄՈՏ 20 ՐՈՊԵ)

Նպատակներ

Արտածել $E(aX + b)$ և $Var(aX + b)$ բանաձևերը:

Կիրառել $E(aX + b)$ և $Var(aX + b)$ բանաձևերը:

Առաջադրանքի նկարագիր և իրականացման ուղեցույց

Այս առաջադրանքի միջոցով ուսուցիչը ընդլայնում է մաթեմատիկական սպասման գաղափարը: Որոշ իրավիճակներում պատահական մեծության բոլոր արժեքները կարող են բազմապատկվել որևէ հաստատունով: Հետևաբար՝ X -ի փոխարեն ստացվում է aX : Օրինակ՝ երբ խանութի բոլոր ապրանքների վրա սահմանված է նույն զեղչը, ապա կարելի է ասել, որ X -ի բոլոր արժեքները բազմապատկվել են նույն a հաստատունով: Այսպիսով, մեզ հետաքրքիր է մաթեմատիկական սպասման և դիսպերսիայի հետ տեղի ունեցող փոփոխությունները: Ուսուցիչը պարզ օրինակ է բերում, որպեսզի սովորողները գտնեն մաթեմատիկական սպասումը և դիսպերսիան: Այնուհետև, բազմապատկելով բոլոր արժեքները տրված հաստատունով, գտնում են մաթեմատիկական սպասումը և դիսպերսիան: Նույնպես, սովորողները լուծում են օրինակ, որտեղ բոլոր արժեքներին գումարվում կամ հանվում է a հաստատունը:

X	4	12	20
$P(X)$	0,5	0,3	0,2

$$E(X) = 9,6,$$

X	4	12	20
X^2	16	144	400
$P(X)$	0,5	0,3	0,2

$$E(X^2) = 131,2,$$

$$Var(X) = E(X^2) - (E(X))^2 = 39,04:$$

Դիտարկենք դեպք, երբ արժեքները բազմապատկվում են 0,75 հաստատունով:

$Y = 0.75X$	3	9	15
$P(Y)$	0,5	0,3	0,2

$$E(Y) = E(0,75X) = 7,2 = 0,75 \times 9,6 = 0,75E(X)$$

$Y = 0.75X$	3	9	15
Y^2	9	81	225
$P(Y)$	0,5	0,3	0,2

$$E(Y^2) = 73,8,$$

$$Var(Y) = E(Y^2) - (E(Y))^2 = 21,96 = 0,75^2 \times 39,04:$$

Նշված կապը բացահայտելու համար սովորողներին հնարավոր է՝ անհրաժեշտ լինի որոշակի ժամանակ և օգնություն: Սովորողները եզրակացնում են, որ $E(aX) = aE(X)$ և $Var(aX) = a^2 Var(X)$: Այնուհետև, դիտարկում են ոչ թե բազմապատկելու, այլ արժեքներից հաստատունի հանելու դեպքը (բերված օրինակում հաստատունը 2 է):

$Y = X - 2$	2	10	18
$P(Y)$	0,5	0,3	0,2

$$E(Y) = E(X - 2) = 7,6 = 9,6 - 2 = E(X) - 2,$$

$Y = X - 2$	2	10	18
Y^2	4	100	324
$P(Y)$	0,5	0,3	0,2

$$E(Y^2) = 96,8,$$

$$Var(Y) = E(Y^2) - (E(Y))^2 = 39,04 = Var(X):$$

Սովորողները եզրակացնում են, որ $E(X + a) = E(X) + a$ և $Var(X + a) = Var(X)$:

Առաջադրանքի ավարտին սովորողները եզրակացնում են՝

$$E(aX) = aE(X), E(X + b) = E(X) + b,$$

$$Var(aX) = a^2 Var(X), Var(X + b) = Var(X):$$

Վերջում ուսուցիչը նշում է, որ նրանք կարող են միավորել այդ երկու բանաձևերը և ստանալ՝ $E(aX + b) = aE(X) + b$ և $Var(aX + b) = a^2 Var(X)$:

ԻՆՔՆՈՒՐՈՒՅՆ ԱՇԽԱՏԱՆՔ (ՄՈՏ 20 ՐՈՊԵ)

Նպատակ

Կիրառել $E(aX + b)$ և $Var(aX + b)$ բանաձևերը:

Առաջադրանք

Խնդիր 1

Հայտնի է, որ $E(X) = 4$, $Var(X) = 3$:

Գտե՛ք հետևյալ արժեքները.

ա) $E(3X)$,

բ) $E(X - 2)$,

գ) $Var(3X)$,

դ) $Var(X - 2)$,

ե) $E(X^2)$:

Խնդիր 2

X մեծության համար տրված է բաշխման հետևյալ աղյուսակը.

$X = a$	0	1	2
$P(X = a)$	0,25	0,5	0,25

Երկու տարբեր եղանակով գտե՛ք $E(Y)$ և $Var(Y)$ արժեքները, որտեղ $Y = 2X + 1$:

Լուծում

Խնդիր 1

ա) $E(3X) = 12$,

բ) $E(X - 2) = 2$,

գ) $Var(3X) = 27$,

դ) $Var(X - 2) = 3$,

$$b) E(X^2) = Var(X) + (E(X))^2 = 4 + 9 = 13:$$

Խնդիր 2

1-ին եղանակ

$X = a$	0	1	2
X^2	0	1	4
$P(X = a)$	0,25	0,5	0,25

$$E(X) = 1,$$

$$E(X^2) = 1,5,$$

$$Var(X) = E(X^2) - (E(X))^2 = 1,5 - 1 = 0,5,$$

$$E(Y) = 2E(X) + 1 = 3,$$

$$Var(Y) = 4 \times Var(X) = 2:$$

2-րդ եղանակ

X	0	1	2
$Y = 2X + 1$	1	3	5
Y^2	1	9	25
$P(X)$	0,25	0,5	0,25

$$E(Y) = 0,25 + 1,5 + 1,25 = 3,$$

$$E(Y^2) = 0,25 + 4,5 + 6,25 = 11,$$

$$Var(Y) = E(Y^2) - (E(Y))^2 = 11 - 9 = 2:$$

Առաջադրանքի նկարագիր և իրականացման ուղեցույց

Սովորողներն աշխատում են ինքնուրույն: Դժվարանալու դեպքում սովորողներն աշխատում են զույգերով, որոնք կազմվում են հետևյալ կերպ՝ ամենաարագն ավարտած սովորողն ամենադժվարացողի հետ մոտեցմամբ: Ուսուցիչը կարող է հարցնել, թե ով օգնության կարիք ունի և ընտրել սովորողի, որը կօգնի դժվարացողներին, կամ ուսուցիչն ինքը կարող է օգնել: Առաջադրանքի ավարտին սովորողները կիսվում են իրենց պատասխաններով դասարանական քննարկման

Ժամանակ: Առաջին խնդրում սովորողները կիրառում են բանաձևեր: Երկրորդ խնդիրը սովորողները կարող են լուծել երկու եղանակով: Առաջին եղանակը համեմատաբար հեշտ է: Նրանք կարող են փորձել լուծել երկրորդ եղանակով, հատկապես եթե նրանց անհրաժեշտ է կիրառել բանաձևերի արտաձուլ:



ՏՆԱՅԻՆ ԱՇԽԱՏԱՆՔ

Հետևյալ խնդիրները հանձնարարել որպես տնային աշխատանք:

Գլուխ 5: Խնդիրներ 18 (էջ 169) հանձնարարել որպես տնային աշխատանք Կ. Առաքելյանի հեղինակած «Հանրահաշիվ և մաթեմատիկական անալիզի տարրեր 10» դասագրքից:

1. $E(X) = 4$, $Var(X) = 10$: Գտնել
ա. $E(2X)$

բ. $Var(2X)$

2. $E(X) = 2$, $Var(X) = 6$: Գտնել

ա. $E(3X)$

բ. $E(3X + 1)$

գ. $E(X - 1)$

դ. $E(4 - 2X)$

ե. $Var(3X)$

զ. $Var(3X + 1)$

է. $Var(X - 1)$

3. X պատահական մեծության միջինը (մաթ սպասումը) 3 է, իսկ դիսպերսիան՝ 9: Գտնել.

ա. $E(2X + 1)$

բ. $E(2 + X)$

գ. $Var(2X + 1)$

դ. $Var(2 + X)$

1. X պատահական մեծության միջինը (մաթ սպասումը) μ է, իսկ ստանդարտ շեղումը՝ σ : Գտնել

ա. $E(4X)$

բ. $E(2X + 2)$

գ. $E(2X - 2)$

դ. $Var(2X + 2)$

ե. $Var(2X - 2)$

4. Y պատահական մեծության միջինը (մաթ սպասումը) 2 է, իսկ դիսպերսիան՝ 9: Գտնել

ա. $E(3Y + 1)$

բ. $E(2 - 3Y)$

գ. $Var(3Y + 1)$

դ. $Var(2 - 3Y)$

ե. $E(Y^2)$

զ. $E[(Y - 1)(Y + 1)]$

5. T պատահական մեծության միջինը (մաթ սպասումը) 20 է, իսկ ստանդարտ շեղումը՝ 5: Պահանջվում է նորմավորել T -ն հետևյալ վանաձևով. $S = 3T + 4$: Գտնել $E(S)$ և $Var(S)$:

6. Կանոնավոր պտուտակը պատրաստված է դիագրամում պատկերված սկավառակից, իսկ X պատահական մեծությունը ցույց է տալիս պտուտից հետո պտուտակի ցույց տված թիվը:


ա. Գտնել X -ի բաշխումը

բ. Հաշվել $E(X)$

գ. Գտնել $Var(X)$

դ. Գտնել $E(2X + 1)$

զ. Գտնել $Var(3X - 1)$:



7. X դիսկրետ պատահական մեծությունն ունի հետևյալ հավանականությունների բաշխումը.

x	-1	0	1	2
$P(X = x)$	0,2	0,5	0,2	0,1

ա. Գտնել $E(X)$

բ. Գտնել $Var(X)$

գ. Գտնել $E(\frac{1}{3}X + 1)$

դ. Գտնել $Var(\frac{1}{3}X + 1)$

Դաս 4: Դիսկրետ հավասարաչափ բաշխում

ՆՅՈՒԹԻ ՄԱՏՈՒՑՈՒՄ ԵՎ ՉՈՒՅԳԵՐՈՎ ԱՇԽԱՏԱՆՔ (ՄՈՏ 10 ՐՈՊԵ)

Նպատակներ

Սահմանել դիսկրետ հավասարաչափ բաշխված մեծություններ:

Սահմանել դիսկրետ հավասարաչափ բաշխված մեծությունների մաթեմատիկական սպասումը

և դիսպերսիան:

Առաջադրանքի նկարագիր և իրականացման ուղեցույց

Առաջադրանքի նպատակն է սահմանել դիսկրետ հավասարաչափ բաշխում: Ուսուցիչը բերում է զառի օրինակը: Սովորողները նկատում են, որ զառը նետելիս թվերից յուրաքանչյուրի բացվելու հավանականությունները հավասար են: Ուսուցիչը նշում է, որ եթե պատահույթի յուրաքանչյուր արժեքի հավանականությունը նույնն է, ապա այդ պատահույթը կոչվում է դիսկրետ հավասարաչափ բաշխված: Այն դիսկրետ է, քանի որ պատահական մեծության հնարավոր արժեքները ոչ բացասական ամբողջ թվեր են:

$X = a$	1	2	3	4	5	6
---------	---	---	---	---	---	---

X^2	1	4	9	16	25	36
$P(X = a)$	$\frac{1}{6}$	$\frac{1}{6}$	$\frac{1}{6}$	$\frac{1}{6}$	$\frac{1}{6}$	$\frac{1}{6}$

$$E(X) = \frac{1}{6} + \frac{2}{6} + \frac{3}{6} + \frac{4}{6} + \frac{5}{6} + \frac{6}{6} = \frac{21}{6} = 3,5,$$

$$E(X^2) = \frac{1}{6} + \frac{4}{6} + \frac{9}{6} + \frac{16}{6} + \frac{25}{6} + \frac{36}{6} = \frac{91}{6},$$

$$Var(X) = E(X^2) - (E(X))^2 = \frac{91}{6} - \frac{441}{36} = \frac{35}{12}:$$

Եթե կա n հնարավոր ելք, ապա յուրաքանչյուրի հավանականությունը $\frac{1}{n}$ է:

Ուսուցիչը տալիս է $E(X) = \frac{n+1}{2}$ և $Var(X) = \frac{(n+1)(n-1)}{12}$ բանաձևերը:

Ուսուցիչը հանձնարարում է սովորողներին կիրառել այդ բանաձևերը նախորդ օրինակի վրա.

$$E(X) = \frac{7}{2} = 3,5,$$

$$Var(X) = \frac{7 \times 5}{12} = \frac{35}{12}:$$

ԻՆՔՆՈՒՐՈՒՅՆ ԱՇԽԱՏԱՆՔ (ՄՈՏ 10 ՐՈՊԵ)

Նպատակ

Կիրառել դիսկրետ հավասարաչափ բաշխված մեծությունների մաթեմատիկական սպասման

և դիսպերսիայի բանաձևերը:

Առաջադրանք

Սափորում կա 10 գնդակ՝ համարակալված 1-ից 10 թվերով: Բոլոր գնդակները նույն հավանականությամբ կարող են ընտրվել:

- 1) Գտե՛ք այն գնդակի ընտրվելու հավանականությունը, որի վրա գրված է 3:
- 2) Գտե՛ք այն գնդակի ընտրվելու հավանականությունը, որի վրա գրված է 3-ից փոքր թիվ:
- 3) Գտե՛ք մաթեմատիկական սպասումը:
- 4) Գտե՛ք դիսպերսիան:

Լուծում

- 1) $P(X = 3) = \frac{1}{10} = 0,1,$
- 2) $P(X < 3) = P(X = 1) + P(X = 2) = \frac{2}{10} = 0,2,$
- 3) $E(X) = \frac{11}{2} = 5,5,$
- 4) $Var(X) = \frac{(10+1)(10-1)}{12} = 8,25:$

Առաջադրանքի նկարագիր և իրականացման ուղեցույց

Սովորողներն աշխատում են ինքնուրույն: Դժվարանալու դեպքում սովորողներն աշխատում են զույգերով, որոնք կազմվում են հետևյալ կերպ՝ ամենաարագն ավարտած սովորողն ամենադժվարացողի հետ մոտեցմամբ: Ուսուցիչը կարող է հարցնել, թե ով օգնության կարիք ունի և ընտրել սովորողի, որը կօգնի դժվարացողներին, կամ ուսուցիչն ինքը կարող է օգնել: Առաջադրանքի ավարտին սովորողները կիսվում են իրենց պատասխաններով դասարանական քննարկման ժամանակ: Բոլոր մասերում սովորողները կարող են կիրառել բանաձևերը և ստանալ պատասխանները: Երկրորդ մասում նրանք պետք է վերաձևակերպեն $X < 3$ պատահույթը՝ $X = 1, 2$ պատահույթի:

ԶԵՎԱՎՈՐՈՂ ԳՆԱՀԱՏՈՒՄ (20 թույլ)

Բաժնի ավարտին իրականացվում է ձևավորող գնահատում՝ գաղափարի ընկալման և ընթացիկ գիտելիքի վերաբերյալ: Էական է, որ ձևավորող գնահատումը համապատասխանի տվյալ բաժնի նպատակներին/վերջնարդյունքներին և ներառի ամբողջը: Այս գնահատումն արտացոլում է Գլուխ 3-ի բաժին 2-ը: Ստորև բերված է ձևավորող գնահատման օրինակ:

Խնդիր 1

Խաղը կայանում է մետաղադրամը երկու անգամ նետելու դեպքում: Մասնակիցը շահում է 5 եվրո յուրաքանչյուր գիր դուրս գալիս և կորցնում 2 եվրո՝ զինանաշանի դուրս գալու դեպքում: Դիցուք՝ X -ով նշանակված է շահույթը ցույց տվող պատահական մեծությունը:

- 1) Որոշե՛ք X -ի հնարավոր արժեքները:
- 2) Գծե՛ք համապատասխան ծառածև դիագրամը:
- 3) Գտե՛ք X -ի բաշխման օրենքը:
- 4) Հաշվե՛ք $P(X < 4)$.
- 5) Հաշվե՛ք X -ի մաթեմատիկական սպասումը, դիսպերսիան և ստանդարտ շեղումը:
- 6) Պատկերացրե՛ք՝ շահույթը և կորուստը կրկնապատկվել են: Այսպիսով, գիր դուրս գալու դեպքում մասնակիցը շահում է 10 եվրո, իսկ զինանաշանի դուրս գալու դեպքում կորցնում է 4 եվրո: Նոր պատահական մեծությունը նշանակված է Y -ով:

Գտե՛ք $E(Y)$ և $Var(Y)$:

Խնդիր 2

Նետել են քսանանիստ կանոնավոր գառ, որի նիստերը համարակալված են 1ից 20 թվերով: Դիցուք՝ X պատահական մեծությամբ նշանակված է գառը նետելիս բացված միավորների քանակը:

- 1) Գտե՛ք $E(X)$:
- 2) Գտե՛ք $Var(X)$:



ՄԱԹԵՄԱՏԻԿԱԿԱՆ ԿԱՐՈՂՈՒԹՅՈՒՆՆԵՐԻ ԳՆԱՀԱՏՈՒՄ

Կան այլ մաթեմատիկական կարողություններ, որ ուսուցիչը պետք է գնահատի տարբեր բաժինների ընթացքում՝ ռուբրիկ կամ սանդղակ օգտագործելով: Այս կարողություններից են հետազոտումը/փորձը, գնահատական տեխնոլոգիական գործիքների կիրառումը, մաթեմատիկական մոդելավորումը, խնդիրների լուծումը, ներկայացումը, վերացական մտածողությունը, հաշվելը, մաթեմատիկորեն հաղորդակցվելը: Յուրաքանչյուր բաժնի ավարտին յուրաքանչյուր սովորողի հետ անհատապես կարելի է իրականացնել նմանատիպ գնահատում:

Կախված գնահատման արդյունքներից՝ ուսուցիչը կարող է յուրաքանչյուր սովորողի հետ անհատապես աշխատել ինքնուրույն կամ խմբային աշխատանքների ժամանակ՝ ուժեղացնելով անհրաժեշտ կարողությունը:

Տրված աղյուսակի օգնությամբ ուսուցիչը կարող է գնահատել յուրաքանչյուր սովորողի մաթեմատիկական կարողությունները:

	Առկա չէ	Պետք է բարելավել	Լավ	Գերազանց
Մաթեմատիկական մոդելավորում				
Խնդրի լուծում				
Ներկայացում				
Վերացական մտածողություն				
Հաշվում				
Մաթեմատիկորեն հաղորդակցում				
Տարբեր տեխնոլոգիական գործիքների փորձարկում				



ՏՆԱՅԻՆ ԱՇԽԱՏԱՆՔ

Հետևյալ խնդիրները հանձնարարել որպես տնային աշխատանք:

1. X -ը դիսկրետ հավասարաչափ բաշխված պատահական մեծություն է 1, 2, 3, 4 և 5 արժեքներով: Հաշվե՛ք X -ի մաթեմատիկական սպասումն ու դիսպերսիան:
2. Պարկում կա 7 միատեսակ գնդակ, որոնց վրա գրված են 1-7 թվերը: Պատահականորեն հանում են մեկ գնդակ: X -ը գնդակի վրայի թիվն է:
ա. Գտե՛ք $E(X)$:
բ. Գտե՛ք $Var(X)$:
3. Կանոնավոր զառը նետում են մեկ անգամ: X -ը զառի վրա բացված թիվն է:
ա. Հաշվե՛ք X -ի մաթեմատիկական սպասումն ու դիսպերսիան:
բ. Հաշվե՛ք հավանականությունը, որ X -ը միջինից գտնվում է մեկ ստանդարտ շեղման միջակայքում:
4. 2, 4, 6, ..., 20 զույգ թվերով խաղաքարտերի տուփից պատահականորեն ընտրում են մեկ խաղաքարտ: X -ը խաղաքարտի վրայի թիվն է:
ա. Գտե՛ք $P(X > 15)$:
բ. Գտե՛ք X -ի մաթեմատիկական սպասումն ու դիսպերսիան:
5. Կրկնե՛ք նախորդ խնդիրը կենտ թվերի համար:
6. Թղթի վրա առանձնացնում են հատված, որը բաժանում են 4 հավասար մասերի և ստացված հատվածները համարակալում են 1, 2, 3 և 4 թվերով: Խնջույքի ընթացքում խաղ են խաղում, որի ժամանակ կապում են որևէ մեկի աչքերը, ով հատվածի վրա կետ է դնում: Գրանցում են հատվածի համարը, որին պատկանում է կետը: Առաջարկվում է որպես բաշխում դիտարկել հավասարաչափ դիսկրետ բաշխումը (1, 2, 3, 4) բազմության վրա: Մեկնաբանե՛ք այս առաջարկը:
7. Արդար խաղի համար օգտագործում են կանոնավոր պտուտակ: Մեկ պտույտ անելու համար պետք է վճարել 5 ցենտ: Պտուտակը պտտելուց բացված թիվը ցույց է տալիս շահած գումարը:

Կրկնություն և ամփոփիչ գնահատում

Դասերի քանակը՝ 2

1. Վերոսուցանում և կրկնության խնդիրներ:
2. Ամփոփիչ գնահատում և ամփոփիչ գնահատման վերլուծություն:

Դաս 1: Վերոսուցանում և կրկնության խնդիրներ

ՎԵՐՈՒՍՈՒՑԱՆՈՒՄ (ՄՈՏ 20 ՐՈՊԵ)

Նպատակներ

Վերանայել Գլուխ 3-ի Բաժին 1 և 2-ի դժվար հատվածները:

Առաջադրանքի նկարագիր և իրականացման ուղեցույց

Դասի ընթացքում ուսուցիչը կրկնում է սովորողների համար դժվար ցանկացած թեմա: Նա կարող է ընտրել, թե որ մասերը վերանայել՝ հիմնվելով ձևավորող գնահատումների արդյունքների վրա: Թեմաների վերանայման ընթացքում ուսուցիչը հանձնարարում է որոշ սովորողների իրենց ներդրումն ունենալ: Դասընկերներին ուսուցանելը կարող է օգտակար լինել և՛ այն սովորողի համար, ով բացատրում է, և՛ ում բացատրում են: Դասընկերոջը բացատրելու ընթացքում ուսուցիչը ստուգում է՝ արդյոք թյուրըմբռնումներ չկան: Ինչ վերաբերում է դժվարացող սովորողներին, որոշ դեպքերում հնարավոր է՝ նրանք նյութն ավելի լավ ըմբռնեն, եթե այն բացատրվի դասընկերոջ կողմից: Այս առաջադրանքն իրականացվում է ամբողջ դասարանով կամ փոքր խմբերով. տևողությունը կարող է տարբեր լինել՝ կախված սովորողների դժվարություններից:

ԻՆՔՆՈՒՐՈՒՅՆ ԱՇԽԱՏԱՆՔ (ՄՈՏ 20 ՐՈՊԵ)

Նպատակ

Վերանայել Գլուխ 3-ի Բաժին 1 և 2-ի հիմնական հասկացությունները

Առաջադրանքի նկարագիր և իրականացման ուղեցույց

Սովորողներն ինքնուրույն են կատարում կրկնության խնդիրները: Դժվարանալու դեպքում սովորողներն աշխատում են զույգերով, որոնք կազմվում են հետևյալ կերպ՝ ամենաարագն ավարտած սովորողն ամենադժվարացողի հետ մոտեցմամբ: Ուսուցիչը կարող է հարցնել, թե ով օգնության կարիք ունի և ընտրել սովորողի, ով կօգնի դժվարացողներին, կամ ուսուցիչն ինքը կարող է օգնել: Կրկնության խնդիրները կարող են ընտրվել ձևավորող գնահատման այն հատվածներից, որոնք ամենադժվարն են եղել սովորողների համար: Խնդիրները լուծելու ընթացքում ուսուցիչը պատասխանում է սովորողների հարցերին և անհատապես վերուսուցանում գլխի առանձին մասերը:

Նմուշ խնդիրներ

Խնդիր 1

Սափորում կա 12 գնդակ՝ 8 սև և 4 կարմիր: Սև գնդակները համարակալված են 1-ից 8 թվերով: Կարմիր գնդակները համարակալված են 1-ից 4 թվերով: Սափորից պատահականորեն վերցնում են մեկ գնդակ:

Դիտարկե՛ք հետևյալ պատահույթները.

$M = \{4\text{-ի բազմապատիկ է դուրս եկել}\},$

$B = \{կարմիր գնդակ է դուրս եկել\}:$

1) Գտե՛ք $P(M)$, $P(B)$, $P(M \cap B)$, $P(M \cup B)$, $P(\overline{M})$ և $P(\overline{B})$:

2) Ստուգե՛ք M և B պատահույթներն անկախ են, թե ոչ:

Խնդիր 2

Կինոթատրոնի տնօրենին հետաքրքրում է իր հանդիսատեսի նախընտրած ֆիլմերի ոճը, ինչպես նաև, թե որքան է օգտվում քաղցրավենիքի բաժնից: Մի քանի ամսվա ուսումնասիրությունը ցույց է տվել, որ հանդիսատեսի 40% նախընտրում է մարտաֆիլմեր, 35%-ը՝ մուլտֆիլմեր, իսկ մնացածը՝ կատակերգություններ: Մարտաֆիլմեր դիտողների կեսը գնում է քաղցրավենիք, մուլտֆիլմ դիտողների 80%-ն է գնում քաղցրավենիք, իսկ կատակերգություն դիտողների՝ 70%-ը: Պատահական հանդիսատեսի հետ հարցազրույց են անցկացնում նրա՝ կինոթատրոնից դուրս գալիս: A , T , C և S տառերով են նշանակված հետևյալ պատահույթները.


$A = \{\text{հանդիսատեսը դիտել է մարտաֆիլմ}\}$,

$T = \{\text{հանդիսատեսը դիտել է մուլտֆիլմ}\}$,

$C = \{\text{հանդիսատեսը դիտել է կատակերգություն}\}$,

$S = \{\text{հանդիսատեսը գնել է քաղցրավենիք}\}$:

1) Կրկնօրինակե՛ք և լրացրե՛ք հետևյալ ծառածառն դիագրամը.



2) Ցույց տվե՛ք, որ $P(F) = 0,665$:

3) Պատահականորեն հարցազրույց են վերցնում քաղցրավենիք գնած հանդիսատեսից: Որքա՞ն է հավանականությունը, որ նա մուլտֆիլմ է դիտել:

4) Կինոթատրոնի տոմսն արժե 2000 դրամ: Քաղցրավենիքն արժե 1000 դրամ:

X պատահական մեծությամբ նշանակված է կինոթատրոն այցելելու ծախսը:

ա) Որոշե՛ք X -ի հավանականությունների բաշխման օրենքը:

բ) Որոշե՛ք հանդիսատեսի կինոթատրոն այցելելու միջին ծախսը:

գ) Հաշվե՛ք համապատասխան դիսպերսիան և ստանդարտ շեղումը:

դ) Արձակուրդների ընթացքում բոլոր գները կրկնապատկվում են:

Մաթեմատիկական սպասումը կրկնապատկվում է: Դիսպերսիան կրկնապատկվում է:

Այս խնդիրները ֆրանսիական բակալավրիատի պաշտոնական քննության նմուշներից են:

Խնդիր 3

Սափորում կա 100 գնդակ՝ համարակալված 1-ից 100 թվերով: Բոլոր գնդակները նույն հավանականությամբ կարող են դուրս գալ:

- 1) Գտե՛ք այն գնդակի դուրս գալու հավանականությունը, որի վրա գրված է 22:
- 2) Գտե՛ք այն գնդակի դուրս գալու հավանականությունը, որի վրա գրված է 22-ից փոքր թիվ:
- 3) Գտե՛ք մաթեմատիկական սպասումը:
- 4) Գտե՛ք դիսպերսիան:

Դաս 2: Ամփոփիչ գնահատում

Տևողություն՝ 35 րոպե:

Գլխի վերջում տեղի է ունենում ամփոփիչ գնահատում՝ գաղափարի ընկալման և ընթացիկ գիտելիքի վերաբերյալ: Շատ կարևոր է, որ ամփոփիչ գնահատումը համապատասխանի դասերի հիմնական նպատակներին:

Այս գնահատումը արտացոլում է Գլուխ 5-ի 1 և 2 բաժինների նյութերը:

Ամփոփիչ գնահատման օրինակ

Խնդիր 1

Խաղաքարտերը 52 են՝ 13 ագռավ, 13 խաչ, 13 սիրտ, 13 ագուռ: Յուրաքանչյուր տեսակի մեջ կա մեկ թագուհի: Դիտարկե՛ք հետևյալ պատահույթները.

$Q = \{\text{թագուհի վերցնելու}\},$

$H = \{\text{սիրտ վերցնելու}\}:$

1) Գտե՛ք $P(H), P(Q), P(H \cap Q), P(H \cup Q), P(\overline{H})$ և $P(\overline{Q})$:

2) Արդյո՞ք H և Q պատահույթներն անկախ են:

Խնդիր 2

իր կայունության քաղաքականությունը բարելավելու նպատակով ընկերությունն իրականացրել է վիճակագրական հետազոտություն՝ իր ստեղծած թափոնների վերաբերյալ: Հետազոտության արդյունքում թափոնները դասակարգվում են՝ ըստ երեք տեսակի:

- 69% միներալներ են և ոչ վտանգավոր թափոններ,
- 28% ոչ միներալներ են և ոչ վտանգավոր թափոններ,
- մնացածը՝ վտանգավոր թափոններ:

Հետազոտության արդյունքում նաև պարզվում է.

- 73%-ը միներալների և ոչ վտանգավոր թափոնների վերամշակվող է,
- 49%-ը ոչ միներալների և ոչ վտանգավոր թափոնների վերամշակվող է,
- 35%-ը վտանգավոր թափոնների վերամշակվող է:

Պատահականորեն թափոն է ընտրվում: Դիտարկե՛ք հետևյալ պատահույթները.


$M = \{\text{թափոնը միներալ է և ոչ վտանգավոր}\},$

$N = \{\text{թափոնը ոչ միներալ է և ոչ վտանգավոր}\},$

$D = \{\text{թափոնը վտանգավոր է}\},$

$R = \{\text{թափոնը վերամշակվող է}\}:$

1) Կրկնօրինակե՛ք և լրացրե՛ք հետևյալ ծառածն դիագրամը:



2) Գտե՛ք հավանականությունը, որ ընտրված թափոնը վտանգավոր է և վերամշակվող:

3) Գտե՛ք $P(M \cap \bar{R})$ հավանականությունը և մեկնաբանե՛ք արդյունքը խնդրի համատեքստում:

4) Ցույց տվե՛ք, որ $P(R) = 0,6514$:

5) Ենթադրենք ընտրված թափոնը վերամշակելի է: Որքա՞ն է հավանականությունը, որ այդ թափոնը ոչ միներալ է և ոչ վտանգավոր:

5) Գործարանի արտադրանքից պատահականորեն վերցնում են 3 թափոն: Ցուրաքանչյուրի վերամշակելի լինելն անկախ է մյուսինից:

X պատահական մեծությամբ նշանակված է ընտրանքում եղած վերամշակելի թափոնների քանակը:

ա) Գտե՛ք X -ի հնարավոր արժեքների բազմությունը:

բ) Գտե՛ք X -ի հավանականությունների բաշխման օրենքը:

գ) Հաշվե՛ք X -ի մաթեմատիկական սպասումը, դիսպերսիան և ստանդարտ շեղումը:

Այս խնդիրները ֆրանսիական բակալավրիատի պաշտոնական քննության նմուշներից են:

Դասի ավարտին ուսուցիչը վերլուծում է ամփոփիչ գնահատման արդյունքները, որոշում դասարանում տարածված սխալները և սովորողների թույլ կողմերը: Ըստ անհրաժեշտության՝ կարող է որոշ թեմաներ նորից բացատրել:

ԳԼՈՒԽ 4

ԹՎԱՅԻՆ ՖՈՒՆԿՑԻԱ

